



BJP-i ano Tir candidate meshim: Amit Shah

Dalai Lama-i pa melenzüker shimtsü akok: Lobsang Sangay

Election mapang yimtaki maotsü lemtet

Dimapur, May 21 (TYO) : Taruba state general election nungibo Dimapur nung alir Aotsür Aortem Dimapur toktsür kechalenia maotsü saka Dimapur nungsa pei pei constituency nung pei pei vote agütsüsü lemtetogo.

Nagaland nung kodangsa general election agidir, Dimapur nung alir Aotsür Aortem teimbaka Mokokchung district kübok pei pei tsürabur yim aser constituency bushia omar, ibayongji Dimapur nung Aotsür-Aotsürtemi yimten nung junga shilem magitetter, ta yangi Dimapur nung Honibar nü Ao Senso Telongjem, Dimapur, Ao Senso Telongjem Chumukdima aser Ao Senso Telongjem Medziphema telongjem senden ka nung Dimapur nung alir Aotsür Aor tashimait ka reprangteta jembiogo.

"Anungji, tang nungibo Dimapur nung alir Aotsür Aor, election-i aitsü pur candidate-tem dak alaka, shinga state general election mapang Dimapur toktsür

pei tsürabur yimtsüngi maotsüla," ta Dimapur district kübok tenteta aliba Aor telongjem aseme lemtetba osang ka metetdaksüogo.

Dimapur district nung assembly constituency pongo lir. Itemji Dimapur I, II, III aser Ghaspani I aser II. Item constituency-tem rongnungji Ghaspani II dak alaka tanüngba constituency pezü nungjibo Aotsür Aor kibong aser nütüsing tangar dang teimba asütsüsa Tsüngremi moaja lir. Ajisüaka, yimten temeten aser khuret memeteti election mapang nung teimbakati toktsür aoba agi tangari mezüngshir aser akümüketa merepranger ta Dimapur nung Aor lenirtemisa ashi.

Mokokchung district-ji Mokokchung district nung alirtem nem toktsür, talisa Dimapur aser Kohima nung alirtemi pei pei alidak vote agütsüra, Nagaland asoshi Aotsür Aortem shilem tuluba agitetsü ta parnokisa ashi.

Aor linük tenzüker tem telongjem senden ali

Dimapur, May 21 (TYO) : Naga nung yimten nüjiso bushitsü atema tenzüka Naga National Council ya mezüng Aor lenir Wb.T.Aliba Imti tir ser tenzüka tang tashi nung Aotsür Aor aikati taküm ajak bendanga agüja tenzüka arudagi ta Ao Senso Linük Tenzüker Telongjem (ASLTT) sangdong ka nung metetdaksüogo.

Ajisüaka, tanübo Naga nung telok balala lemsar alidak Aortem tongti shilem magitetter, ibaji

temulung shirangtsüka lir. Item khuretji reprangteta Merangkong nung putu yimsüürtem den May 18, 2017 anogo nung Aor longjemshir Naga yimten tebilemsü repranga tongti shilem agitsü nüngdakba indang ken o lemtepa liasü ta parnokisa metetdaksü.

"Maneni ASLTT-i Ao Senden, ABAM, tzükong aser yimtsüng telongjemtem ajurua shisalemsatepa jajatsü sentong lir, anungji ajaki sarasadem nung yaridaksüner," ta parnokisa ashi.

ANTAM-i 44 AR inyakyim aitsür

Dimapur, May 21 (TYO): May 20, 2017 anepdang 44th Assam Rifles-i ANTAM tir, I Tali Jamir apuba kukua aitsür, ta All Nagaland Taxi Association Mokokchung (ANTAM)-i sangdong ka nung ashi.

ANTAM tirji Honibar anepdang Alino bus counter nung Naga Political Groups (NPGs) ka nungi sen saruba shidi agütsüsü atema aodang Assam Rifles sepaitem civilian dress nung pa apu aser gari nung anioker 44th AR Camp-i anir ao. Idakji asüngdangya asüba sülen pa Mokokchung Police Station-I ket nung agütsü, ta ANTAM

sangdong nung shia lir.

Assam Rifles-i asüngdangya asüba nung ANTAM tir dak tai mesüra pai aibelenia inyakba kecha meputetba agi pa chiok. Ajisüaka, iba inyakyim ajanga ANTAM tir nem timtem tulu agütsüogo aser amajok nung tekolok anibelemdaksüogo. Maneni, iba inyakyim ajanga Mokokchung district nung aliba taxi anishirtem nem tetsübu tensa ka bener arutsüogo, ta ANTAM Tatong Tir, S. Toshi aser Tongti Tezülur, Meren Longchar nati sangdong nung shia lir.

(Maneni tapak 12 nung...)

Dimapur nung kinungboi kinungtsü lepset

Dimapur, May 21 (TYO): Honibar aonung Dimapur kübok New Chumukedima nung kanga dang taoksatsü aketba lendong ka atalok aser ibaji kinungbo kati kinungtsü lepsetba lir.

Tetsürla yiruba sülen Chumukedima nung aliba mozüki kati anir oa saka la idakji meküzmüketeti asi, ta police-i ashi.

Zübo tereprangtsü nung tetsürla dak nok agi alepba ama ajiteter aser iba tatalokba sülen, la kinungbo jenogo. Paji Longsa Chetri ta jangjaogo saka pa kong lir mangur.

Tetsürlaji kechi atema tepsetar kuli kecha mongutet lir aser iba dak sendakba nung ken o benoker bushisüngdang ka tenzüko, ta police-i metetdaksü.

Kohima nung AIDS candlelight memorial kaogo

Kohima, May 21 (TYO): Nagaland nung People Living with HIV & AIDS (PLHIV) nisungtem dang mesenmetui benshiba aser sendokba anema raratsü nüngdak, aser lokti nung parnok nem shilem agidaksütsü nüngdak ta ajungshitepogo.

Deobar nikongdang Naga Hospital Authority Kohima (NHAK) nung Nagaland State AIDS Control Society aser Nagaland Network of PLHIV (NNP+) nati senteper "Ending AIDS together" omen nung ajemdaker International AIDS Candlelight memorial sentong ayonga amungdang NHAK Medical Superintendent, Dr. Thorhusie Katiri-i, "Lokti nung PLHIV tem (HIV aser AIDS keta alirtem) dang mesenmetui benshiba aser parnok sendokba melenshitsü atema nisungtem mulungsentüsü melenshitsü nüngdaker, aser parnok akhi ama 'normal life' ka lidaksütsü atema asenoki yaritsü nüngdaker," ta metetdaksü.

Parnok anema benshiba aser sendokba ajanga PLHIV aikati treatment agitsü atema tejakleni marur. Kodang HIV positive nisung kati ART (anti retroviral therapy) treatment agi tenzükdir pa/la temang anema litettsü, aser



May 21, 2017 nü NHAK, Kohima nung International AIDS Candlelight memorial sentong alidang tangokba noksa nung angur.

iba tashidak agi nisung asüba-ajema akümtsü, ta Katiri-i ashi.

Iba dak sendakba nung pai ajak dang, senso tajung ka ama PLHIV atema longjemmer inyaksü ajungshi.

NNP+ Tir, Lanu-i iba anogomung teratet lemsatepdang pai, International AIDS Candlelight Memorial mapatong ya, HIV/AIDS tashidak agi masüba lima ka yangertsü aser parnok taküm akhi ama normal litettsüsa nüburtem ajungshitsü, iba den

külemi HIV agi kongshia alirtem akhümtsübuttsü, yaritsü aser parnok atema jembitsütsü atema lir, ta metetdaksü.

Iba sentong nung shilem agirtemi shimo milen tsükloker AIDS tamatsü noksa yangluba den HIV aser AIDS agi asürtem bilemteta sarasadema liasü.

Iba sentong ya Thejangunuo Theunuo leniba nung agi aser NHAK Chaplain, Vikepu Tapa-i tetenzük sarasadem agi aser NHAK Nursing student temi ken ka tena liasü.

Imphal nung Japan-i WWII sepaitem tushir

Imphal, May 21 (Agencies): India nung Japanese Ambassador, Kenji Hiramatsu-i anir Japan nung telok kati Honibarnü Imphal anasa aliba Maibam Lotpa Ching, India Peace Memorial semdangogo.

Japan nung telokji 'Battle of Imphal, World War II' küm 73 ajungba bilemtetbamung nung adentsü atema aruba lir.

Japanese Ambassador den

Japan nung teshimtet nübo 30 den Nagaland parliamentary secretary, C Apok Jamir aser Burma Campaign Society chairperson, Akiko Macdonald nungertem aru.

'Battle of Imphal, World War II' anogomungji Manipur Tourism Forum aser 2nd WW Imphal Campaign Foundation nati state Tourism department den yaritepa ayongzüker.

Ambassador Kenji Hiramatsu-i ashiba agi, Bishenpur district nung aliba Maibam Lokpa Ching nung Japan-i war museum ka yanglutsü.

World War II mapang Maibam Lokpa Ching nung British aser Japanese sepaitem rara aser March nungi June 1944 tsüngda Imphal aser Kohima nung Japan nung sepai 70,000 shi taküm sama.

(Maneni tapak 11 nung...)

NDA sorkari Kashmir onük tatem küma latettsü: Rajnath

Pelling (Sikkim), May 21 (Agencies): Jammu & Kashmir nung tang tashi tensa mesüngjemteter. Election anogo nungji security sepaitemi injang yokdang nisung ti khaseta liasü.

Yaküma sepaitemi Hizbul Mujahideen telungpur commander, Burhan Wani khasetba sülen iba anema longkak aйдang nisung 80 shi süogo.

Tanü Sikkim anüolen aliba Pelling jila nung lokti senden ka nung jembidang Singh-i, Kashmir nung timtem agütsüba ajanga Pakistan-i India linük tashi meitdaksütsü meranger, ta aitsü.

"Ajisüaka ozü sorkari teti atema Kashmir onük latettsü," ta paisa ashi.

Tanü Rajnath-i, "Kashmir ji asen meyong, Kashmir nungertem asen meyong. Onoki Kashmir onük tatem küma latettsü," ta ashi.

Modi sorkari Pakistan densema kidanger linük ajak den tesendaktep tajung ayutsü atema inyaker, ajisüaka Pakistan-ibo par tangatetba memelenshir, aser

parnoki India tashimeiti kümdaksüner, ta Home minister-isa ashi.

"Pakistan-i parnok tangatetba melenshitsü ta onoki amanger. Parnoki memelenshira onoki melenshitsütsüla. Alima ya ka ama dang akümba sülenbo linük kati ka tashi meitdaksütsü makoker, kechiyong alima linüktemi ibaji mamadoktsü," ta paisa shisem.

Home minister-i anogo asemnü atema Sikkim semdanga lir, aser iba mapang nung pai India-China arrtsü kongshia aliba state pongu nungi Chief Minister tem den senden mena security tensa den arrtsülen terenlok mapatema asadanga jembiogo.

Mongsenyimti Kaketshir Telongjem-i kum 75 Jubilee nungtem nungshi mapa inyaksu



Mokokchung, May 21, 2017: Mongsenyimti Kaketshir Telongjem (MKT) tenteter kum 75 abensaba Jubilee mung atema renemshia ataba nungtem nung akhidang tsurabur arem nung aliba mapang Tsungrem kulemba tesem nung anisungzuk semtu ka yanglutsuba May 20 nu lapoktsudang Yimtiba aser Compound Arogo ana nungi sannuker ana, Youth director aser MKT ketdangpurtem kulemi tangokba noksa nung angur.

Mokokchung, May 21 (TYO): Mongsenyimti Kaketshir Telongjem (MKT) tenteter aruba takum December nung kum 75 ajungba Jubilee mung amungtsu nukla yur inyaka arudar aser MKT-i Jubilee nungtem nung akhidang tsurabur arem nung alidang Tsungrem kulemba tesem nung anisungzuk semtu ka yanglutsuba May 20, 2017 nu semzükogo.

Iba semtu lapoktsuba mapang Mongsenyimti Baptist Arogo sannuker, Imti Ozükümi-jembidang Mongsenyimti nung tensa onsara tamajung kati menepa yimeri meinyakba tai tongloktsur India sepaitemi 1956 April 30 nu yim mitsu küma

rondoktsur yimer ajak talidak makai tejenokdak bushia arem nung oa ali, ta ashi. Paisa yimertem ajak arem nung alidang telok ka Azüklen (tsungrem apudong) aser telok ka Kalilulen (Jangnarolu) ta alidang parnok pei alidak tesem nung Tsungrem kulemdak mesemteta külema aruba rongnung Jangnarolu nung aliba Tsungrem kulemdak tesem Kaketshirtemi bilemteta mapa tajung inyaksuba atema teningsanga ashi.

Mongsenyimti nung arem nung alitsü aйдang tamanger noklang shilem nung shilem 5 shi dang liasü saka ita trok arem nung lir yimtsungi tanaben meyipa adokdangbo tamanger

shilem 95 kümer liasü, ta paisa ashi.

Kasa sentong nungsa MKT Advisor, Imotong-ia tatsüka jembidang, Kaketshirtemi Jubilee nungtem akhidang tsurabur tamangba mongchen mesemteta toktsuba ajanga kaketshirtemi Tsungrem dak maneni metaloker aotsü jenjangdong yanglushiba ka sudaktsüsü nukla nung inyakba lir ta ashi.

MKT Tir, Putiwapong-i ketdangsüa aniba sentong nungsa Mongsenyimti Compound Baptist Arogo sannuker Imtimpang-i sentong meshiteta sarasadentsü.

Kohima nung AHOds aser HoDs senden menogo

Kohima, May 21 (TYO): May 20, 2017 nu Secretariat Conference Hall, Kohima nung Nagaland Chief Secretary, Pankaj Kumar, IAS lenisuba kübok Administrative Heads of Departments (AHOds) aser Heads of Departments (HOds) senden menogo.

Aadhar data dak sendakba nung Chief Secretary-i, nisung shia indang Aadhar osang kümzüka ayutsü atema department websites nung osang upload asudang sorkar department temi kanga kümdanga inyaksüla, ta ashi.

Chief Secretary-isa

Aadhar osang dak sendakba nung tienyaksü aser meinyaksü indang telatetbatem metetdaksüba den külemi UIDAI-i lateta aliba ama inyaksü ajungshi.

Paisa, Aadhar number aser iba indang osang kümzüka ayutsü atema mapang shia audit agitsüla, ta shisem.

"Land & Assets Management-encroachment & related issues" indang metetdaksudang Kohima Deputy Commissioner, Rajesh Soundararajan-i sorkar ali dak sendakba nung onük balala indang metetdaksü.

Pai ashiba agi, ken o menoa

magütsüba mesüra ken o magütsüba ama kuli balala ajanga sorkar meyong ali atsünga agir; sorkar ketdangsertemi nijatem den miima inyakba, kiojen osang aser kuli kakettem tejangja maliba ama kulitem ajanga sorkar ali kümzüka ayuba nung timtem adoker.

Paisa, sorkar meyong kiojen nung arrtsü aser atsü junga mali, ta ashiba den külemi sorkar li atsünga kiojen yangluba bendoktsüsü atema ita ana-asep mapang agia inyakba inyakyim metetdaksü.

(Maneni tapak 11 nung...)



Dimapur, May 21, 2017: May 18, 2017 nu HQ IGAR (North) kübok 22 Assam Rifles-i Akhen yimdak Area of Responsibility (AOR) kübok yimtsung balala nungi GBs, Chairman, Student Union aser Secretary tem den shisalemsatepba sentong agiba mapang nung tangokba noksa nung angur. Iba senden nung tesem nung tesunep alitsü atema lisopurtem aser Assam Rifles tsungda ano taliba amalitepa inyaksü asoshi jembia liasü.

AR-i Zungti nung NSCN lenir ana apu

Dimapur, May 21 (TYO): Osang ka lazükba sülen May 19, 2017 nu HQ IGAR kübok 5 Assam Rifles sepaitemi Zungti Forest Area, Zunheboto nung NSCN atsükba tesem ka nguteta Sema Region Finance Incharge, Captain Mughato Sema aser Lotha Region Incharge, Major M Longthung Kikon na puogo; tenaprong NSCN nungi lir, ta tanü Assam Rifles sangdong ka nung metetdaksü.

Tena ket nungi Hand Grenade ka, Nagaland Police Department indang taila identity card ka den trucks, yimdaklirtem aser mapa

inyakertem dang nungi saru saruba kakettem den tashishitsü aketba kakettem apu, ta AR sangdong nungsa shia lir.

Captain Mughato Sema aser Major M Longthung Kikon nati Zunheboto district nung inyaker aser security sepaitem anema inyaksü sentong asameyangba den nüburtem dang nungi ozüing alema sen saruba aser sen akhangba mapa nung densema lir, ta sangdong nungsa shia lir.

Maneni bushisüingdangtsü atema tena den tena ket nungi apubatemji Zunheboto Police Station ket nung agütsü, ta AR-isa metetdaksü.

DMB, AKM aser Kma & Dmr Ao kaketshir-i seminar katsü



Dimapur, May 21 (TYO): Divine Bridge Ministries Delhi (DBM), Ao Kaketshir Telongjem (AKM) aser Kohima o Dimapur Ao student telongjem longjemer lanurtem, tongtibangsa Class 12 pass sür alirtem asoshi "Building on Excellence" omen nung ajemdaker Career Guidance Seminar tesem asem-Mokokchung (May 17 nu), Kohima (May 19) aser Dimapur (May 20) nung kanga takok ngua katsüogo.

Iba seminar nung tongti o jembirtemji- Dr. Jamedi, Assistant professor, Dimapur Govt. College, Kr. Aotula T. Imchen, IPS, Er. Yanger Pongen, Er. Asangba Pongen, Dr S.K Chauhan, Director Alpine Institute of Management & Technology, Dehradun aser Supongchiten, Director, Divine Bridge Ministries, Delhi nung liasü.

Tsuraburtem aser lanurtem Class 10 aser 12 pass sür koloni aotsü? ta shisabulua aliba mapang ka nung DBM aser AKM-i anir iba sentong tajung ayongba ajanga tsuraburtem aser kaketshirtem aika tajangzük nguogo.

Tongtibangsa sentong nung shisalen sayur balalai onük balala nung ajemdaker tajungshiba aser tetuyuba lenmang tajung aika agüja liasü.

Er. Yanger Pongen aser Er. Asangba Pongen nati lanurtem Engineering aser Technical course balala züingnertem asoshi lenmang balala nung tetuyuba agütsü.

Iba dak alia ano Dr. Jamedi Lkr aser Kr. Aotula T Imchen, IPS nati lanur ka takum nung alizüing shidak yuteta tang nungi terenemshiba tulu nung nükjidong tongtetta azüingtsü ajungshia liasü.

Kasa sendong nungsa Dr. SK Chauhan-i tanü Agriculture, Forestry aser Biotechnology azüingba ajanga tajangzük balala indang lemsatepba liasü.

Paisa, par college ajanga asen Naga nung kaketshirtem asoshi lenmang balala nung teyari agütsüsü aser direct admission agütsüsü shisem.

Ano Divine Bridge Ministries, Delhi Director, Supongchiten leniba kübok EduAide Career & Counseling Service lir, aser iba ya ajanga asen Aortem dang masü saka Naga nung aser North East lanurtem jenti admission nung teyari agütsüba den külemi Delhi aser North India tesem balala nung lanurtem timtem aser lendong mapang ajak nung yaria arudar, aser Tsungremer tenzükba wadang balala inyaka arudar.

Kasa seminar nung jembidang Mr. Supongchiten-i ashiba agi, küm shia asen Naga nung tangeri ashiochtsüba, tongtibangsa institution balala aser agent balalai osang tai agüja tsuraburtem aser lanurtem takum, rongsen aika nung aoksadakja tai lenmangtem nung aniba indang shisema liasü.

Anungji koba course südir süika tejangja HRD aser UGC recognized aser approved süa aliba college aser university tem nung azüingtsü paisa ajungshi.

Iba den külemi lanur kati koba lenmang shimdir shimaka tanger jilu ajizüka masü saka pei jangraba, pei dak aketba sempet aser pei akoktsüba lemangtem shima meranga azüingtsü paisa tayongzükba agütsü.

Iba seminar nung lanur aser tsuraburtem noklang ana daka tema arua aden aser tejangertem asoshi course balala nung direct admission agia liasü.



May 21 nü Sikkim, Western District, Sashastra Seema Bal (SSB) 36th Battallion Gayzing semdangba mapang Union Home Minister, Rajnath Singh-i Battalion Head Quarters nung nungshilong azungtsüba yangi angur. Maneni noksa nung Secretary (Border Management), Sanjeevani Kutty aser Director General, SSB, Archana Ramasundaram dena noksa nung angur.

Manipur Forest Dept-i Deputy Ranger ka mapa nungi anentsü

Imphal, May 21 (Agencies): Manipur Forest department nung ketdangser ka Honibarnü mapa shidak meinyakba atema mapa nungi khen atema anentsüogo. Hokolbar aonung süng tarangtsü tata gari load ana apuba atema Manipur Forest & Environment Minister Th. Shyamkumar-i department ketdangsertem merenshiba sülen ghonda isheka dang lir iba telemtetba ya agi.

Department-i Chandel Forest Division, Molnoi Forest Beat Office nung Deputy Ranger, Beat Officer, Md. Altaf Ali Khan mapa shidak meinyakba atema mapa nungi khen atema anentsüogo, ta ketdangsertem osang ka ajanga metetdaksü.

Pa mapa nungi anetsür aliba mapang Md. Altaf Ali Khan indang headquarter ji Divisional Forest Officer's Office, Chandel Forest Division dang asütsü, ta Principal Chief Conservator of Forests & Head of Forest Force Department Kereilhouvi

Angami-i 2017 May 20 nü mapa nung anentsüba tetuyuba agütsüba nung shia aliba osang ajanga metetdaksü.

Mantriphukhri nung Central Forest Division, Range Forest Office nung osangbenertem den jembidang Minister Shyamkumar-i ashiba agi, Central Forest Division DFO, L. Joykumar-i anir par teloki Khabam, Matai Garden nung tarangtsü süng tata gari load ana bener yasüng 8:00 ako shi nung apu. Joykumar-i aniba telok-i iba mapa tajung inyakba atema tenungasangba den külemi Shyamkumar-i ashiba agi, item tata garitem Chandel District kübok Khudengthabi tesem nungi Imphal-i kuli kaket tejangja magütsü aruya liasü.

Shyamkumar-i osang benertem dang ashiba agi, Md. Altaf Ali Khan item süngtem nung 'hammer marks' agütsütsü temelaba agütsü, koba Moreh Range Office nungi agütsütsü tim liasü. Süngtem nung 'hammer mark' keta aliba ajanga iba tata gari

ana entry post aika kuli kaket tejangja magütsü süitet. Iba gari anati Khudengthabi Army Post, Tengnoupal Army Post, Tengnoupal Police Post, Tengnoupal Forest Post, Molnoi Forest Office Post, Pallel Police Station Post, Kakching Forest Office Post, Thoubal Forest Office Post, Thoubal Haokha Range Post, Lilong Police Station Post, Singjamei Police Station Post ajanger Imphal East nung Khabam tesem tonga aru.

Minister-isa ashiba agi, par department ajanga iba amala ozüng alema inyakba mapa anendaksütsü asoshi mapang shia maparen balala inyakdar, kechiyong iba ajanga revenue collection nung tetsükdangtsü adoker. Department-i mapa shidak inyak nungbo küm nung revenue crore 100 arutsü nükjidong yur alibaji melamela tongtettsü. Pai maneni nüburtem dang department-i tetuyuba agütsüba kübok parnok shishilembaba inyakyonga aotsü asoshi mepishe.

MLA Ratan Nath-i BJP pusema jembiba asoshi Congress teloki telangzüba meshir



Agartala, May 21 (Agencies): Tripura nung MLA 9 - Trinamool Congress nungi 6 aser Congerss nungi 3 dang BJP telok nung arua atentsü asoshi anogo züngzütsüba sülen Congress MLA Ratan Nath party nungi

indoktsü mapang anasai arudagi.

Nath-i BJP ideology pusema jembiba ajanga pa dang anogo asem tsüngda nung iba telangzüba agütsütsü metetdaksüogo.

May 6 nung BJP tir, Amit Shah-i Agartala sendangba mapanga Nath-i Amit Shah ajuru aser iba ajanga pai BJP pusema sayur, ta Tripura nung Congress tekolakba, Birajit Singa-i sign süa aliba tetuyuba ka Nath nem agütsüba nung shia lir. Maneni Nath-i tetuyuba agütsüba ama par telok nungi züngsem aika BJP dangi meyip aser ano Congress telok nungi züngsem tali iba telok nung oa adentsü asoshi Nath-i maparen inyakba mapang lir, ta shisema lir. Iba temelenshi marudang

Nath-i Tripura BJP tir, Biplab Deb den senden ka amen aser iba selen osangbener den jembidang Biplab Deb-i CPI(M) indang sorkar nung opposition telok nung lenir ya BJP asütsü shisem.

Nath ya tang tashi Congress nung lir aser pa MLA menden samatsü tsübur, ta Congress-i ashir.

Congress nung tejen nisung aser taoba mapang Chief Minister inyaka alisang, Samir Ranjan Barman-i party anema inyakba aser Agartala nung Swami Vivekananda stadium nung election nübuyim ka aliba sentong nung Trinamool Congress tir, Mamata Banerjee den sabang ka nung külemi amenba asoshi pa ya April ita party nungi indok.

Asür Lanumatong sür küm 28 ajungba Anogo 22nd May 2017



Oba tanü na onok den meliaka na onok molungjang nung teti lir.

- Temeim Oja, Tanurtem, Semchirtem, & Kinungertem.

BJP MLA convoy nung bomb pokloktsü, police commando 4 yiru

Imphal, May 21 (Agencies): Manipur nung BJP MLA aser Parliamentary Secretary (Home), L Sushindro anir senzüba gari ka nung Myanmar arrtsülen aliba Tengnoupal district kübok telungpurtemi bomb pokloktsüba nung police commando pezü yiru aser parnok rongnungi ana bo kanga mejungi yirur lir.

BJP-i aniba sorkar Manipur nung March ita amenloker aliba mapang iba ama gorkar meyong police dak telungpurtemi amakba ya tanaben buba adaloker lir. Mezüng amakba nung telungpur temi IED ka May 8 anogo kasa district kübok Lokchao tesem nung pokdaksüba mapang Territorial Army nungi nisung ana pokset.

Chief Minister, Nongthombam Biren Singh, shibai Home department-a bena lir, pai iba lendong aitsüogo aser aibelenertem aputsü asoshi sorkari maparen balala inyaksü, ta shiogo.

Chief Minister ya state nung terenlok balala bener arutsü aser FIFA U-17 World Cup dak sendakba sentongtem nung adentsü asoshi New Delhi nung lir. Iba lendong atalokba indang MLA tem den jembigo.

Meitei nunger yimtsüng, Kwatha nung Sushindro ya Meitei nunger süngyanglu benjung ka nung adentsü ao aser

iba yimtsüng nungi meyipa adokba mapang pa meina aoba police gari ya jelia adok aser iba lendong ajuru, ta Police ajanga ashi.

Iba gari ya Kwatha aser Imphal-Moreh highway lemjem anasa lia nikongdang 1:30 ako meta bomb ya apok aser lendong nung police pezü yiru. Parnok yirur alirtem ya Sub-inspector L Hmangte, riflemen-Martin Star, S Gourahari aser N Biswanath, ta jangjaogo.

Iba lendong nung Gourahari aser Biswanath-na kanga mejungi yiru aser dena ya amry helicopter ajanga Imphal-i anir ao.

Dena ya Manipur Rifles nung lir aser Imphal East district police nung commando lir.

Iba lendong sülen Manipur Police aser Assam Rifle külemi iba tesem aser India-Myanmar arrtsü, nung India tsütsü aliba tesem ajunga mita bushiogo.

Manipur ya Myanmar den arrtsü kilometre 390 lir.

Iba lendong adalokba tesem leni Imphal aser Thoubal nungi police aser mitkartem tali yokogo. Iba lendong adalokba sülen state nung security tali akangshiogo. Iba lendong agütsüba ya tang tashi telokia katia nangzüka mali.

May 8 anogo Territorial Army ana tepsetba kinungertem nem state sorkari sen lakh 5 agütsütsü sangdongogo.

ULFA (I) pur ka aser NSCN (K) pur ka apu

Guwahati, May 21 (Agencies): ULFA (I) aser NSCN (K) nungi ta telungpur ana security forces temi Assam kübok Tinsukia District nungi yashi puogo. Kohima nung amener aliba Defence PRO Colonel Chiranjeet Konwer-i ashiba agi, ULFA (I) telungpur sang ya Assam-Arunachal Pradesh arrtsü nung Ledo tesem nung DAO division kübok Changlang battalion-i meita aoba mapang nung apu.

Iba telungpur sang ya Bikram Chakma ta jangjaogo aser pa ket nungi 22 caliber pistol ka den injang bena lia apu.

"Pa dang asüngdangyaba nung pai NSCN(K) pur tema nung adoka inyaker Tara Chand aliba tesem parnoknem metetdaksü. Tara Chand ya

rakzükteмба maparen balala nung densema lir aser ano iba tesem nung pai kiralongra maparen balala atema teyari agütsür. Dena ya iba tesem nung nüburtem dang nungi rakzükrakdemba maparen aser ozüngalema inyakba maparen balala nung longjemer inyaka liasü," ta Defence PRO ajanga metetdaksü.

Dena apuba ajanga tawa Assam Rifles puri iba tesem nung telungpur tongti aika pua aoba maparen maneni takok ngua aoba sayur.

Security force temi meita aoba nung kanga takok ngua aoba ajanga iba tesem nung ozüng alema inyaker temi rakzükraktemba maparen inyakba nung tetsükdaksü adokdaksüogo.



TIR YIMYIM

YIMOBILEM (EDITORIAL)

DIMAPUR MONDAY, MAY 22, 2017

Onük jembu tenzükogo

Mapang talangka Nagaland nung yimsüsürtem adenshia yimten ken o lemtepbu mangashidangi arur tan Honibar nü Ex-Parliamentarians Association of Nagaland (Ex-PAN) purtemi Urban Local Bodies aser India temzüng Article 371 (A) dak keta aliba onüktem jembitsü senden ayongzüka jembiba jagi Naga nunger yimsüsürtemi yimten onük benoka jembitsü bilemtetogo ta pelaa bilemer. Alima nung tebilemtsü alibaji tesüngmangtsüka masü saka nübortemi ajuruba tebilemtsü indang yimten yimsüsürtemi mangu aser mangashi ama mejembibajiang tesüngmangtsüka lir. Aji oda, yimten yimsüsürtemi yimten tebilemtsü dak aketba onüktem benoka mejembibaji medical doctor-temi nisungtem timtemba tashidak indang mejembinüi toktsüba amai asütsü. Aji oda, nübortem tashidak wara agi timtemba mapang medical doctortemi iba tashidak akoktsü indang jembia anepalu mesüra nübortemji dang masü saka parnok aser parnok chirnurtem daka iba tashidakji atongtsü aser külemi takoksa aser tesama angutsü. Ibaji mesüka yimten yimsüsürtemi pei lima nung yimten aser lokti tebilemtsü paikaya lir ser nung tatar senden nung tejembitsü kecha maka ama tebilemtsü ken o kecha süoka mejembira, iba jagi tebilemtsü mali akümstsüba masü saka tuluba aser talilaang akümstsü aser iba jagi yimsüsürtemang talila nüken belemtsü aser takoksa tulu angutsü. Iba ama tensa tia aika asenoki taoba mapangtem nung ajuruogo. Tashidak miimshiba agi shirangba aneptsü masü. Iba kasaji shirangba yimya indang jembu nungang tashidak putettsü aser tashidak putet nungang taneptsü mozü bushitettsü. Iba denji kasa yimten aser lokti tebilemtsü ya lir. Nübortem timtemba mangashitsü aser mangutsü merangba agi alima majungtsü saka nübortem timtemba tiaji tonga oagi reprangdang yimten senden nung benoka jembira, külem shisatsü agi, item timtemtemji akoktsü lenmang bushitettsü. Tanü Naga nungertemi ajuruba yimten aser lokti tebilemtsü ya tulu aser tebenja saka makoktsülabo masü. Tang tashi nung tebilemtsü akoktsü melen tuluba kümdaktsübaji asenoki pei kija mesüra pei telok ajangzüksü aser pei ajunglen asaa inyaksü bilema inyakba ajanga lir. Aji oda, Naga yimten tebilemtsü akoktsü bilemtsü melen election nung yimten nüjiso atema inyaker telokang ka teyari agia adoktsü meranga, madokdangyongi Naga yimten tebilemtsü tuluba kümdaktsüogo ta bilemdi. Tanü Nagaland nung Urban Local Bodies election magitetba ajanga India temzüng Article 371 A jembitsü nungdak adoker. Aji oda, kodang Article 371 A jembidir 16 Point Agreement jembitsüsa akümstsü ta Nagaland dak aketba yimten ken o ajak temai adoka tatar senden aser lokti senden nung jembimesotsü. Ibaji Nagaland shirangba tashidak indang jembia taneptsü mozü bushitsü mapa tenzükera asütsü. Tatsüba agi, Nagaland nung Urban Local Bodies election magitetba ya Municipal aser Town council menüngdakba agia masü mesüra saru magütsünüba agi masü mesüra tetsürtem nem yimten nung shilem magidaktsünüba agi masü saka yimten yimsüsürtem o nübortem na tsüngda mangatettepba ajanga lir. Ibaji kibong nung ajaki tajung dang bilemer ser nung tsüraburtemi tanurtem dang angateta mashiba ajanga meputep adok amai lir. Atangji, tatar senden nung latetba ka nübortemi nunga ta ashitsüsa latetbaji tesüngmangtsüka lir. Ibaji tangar bendanger kar ajungbena aruagi lateta yutsür ao amai bilemtsüsa atalokogo. Aji oda, tatar senden nung latetba ka yimtak mamshitettsüsa süra tatartem jenjangji kong lir ? Iba kasaji state tatar senden nung latetba ozüng ka nübortemi magizüktetba ajanga mamshitettsüsa kümra, tatartem jenjangji kong alitsü ? Itemji jungjunga bilemdanga, yimten yimsüsürtemi tatar senden alidang aser malidang mapang ajak nung yimten ken o nübortem rongnung süoka lemsateptsüla. Tatar senden ya senotsü sentong yanglutsü kisüng atema akümba senden kabo masü. Ibai nübortem tebilemtsü aser nungdak jembidak lir. Iba senden nung amenertemi iba khuret aser nungdakji meteta jembipet jembitsüla. Yimten nungdakji o agi jembir aser o jagi mapa akümer aser nübortem anisüngzükera.

OLEMSABANG

Nüjiso bushiba mapa Nokdensang-er ita amai kümadokogo.

-L.Kika Pongener, Aoyimkum, Dimapur.

Tanur yimdong kazür asü dang tsüngsang tajung aonung nüngjang perang-peranger aliba mapang ita tulu jangja-jangja adoka alidang, tsüraburi terongdong nung pongloker ken ka yamai-sa aden, "Ya shir ita Nokdensang-er ita... mapo telunglung züngyi telunglung... aji Nokdensang-er"... oda ken tetezüji-a kechi'ar memeti tsüraburi tenyuba sülen anidaka yamajisa adenba pongmang amai bilemteter.

Tsüraburi tar nunger otsü ashiba agi Nokdensang-er sünglang anasa ita-ji tuluka, oda teka agi-a tonga tangshitettsüsa alua liasü, aser Nokdensang jagi perdong (tsük podaka yur anükdang an mindoktsü ayuba rangdong) agi ita dakji atutsü merang, saka tatonger amai tatonger amai anünglak talangi tua-adok-a ta otsü jembia aru. Aji oda tanü asen Naga nunger nüjiso otsü-a lanuwa mapang nungi tang tangsa angutsü amai jembiyonga aruba jokorla aso ka tesadang dak tali süia aor, oda Nokdensang-er ita ama-ji kümadokogo tasa teti temulong ayanga bilemer, aser ibai künübo asangsang nung ataloktsü asü mataloktsü ta teti shisadanger.

British yimli India limai marudang nungi asen Naga kin ya shinga kin talenba küpok maliasü ta asen tsürabur nungi otsü angashia aru, saka asen o asen na, kin o kin tsüngda tsükchitepa tekolak bushitepa lia aruba otsü dang angashia aru. Ajisüaka kodang India lima ajunga British sorkar yimsüsüba küpoki aitsüsa aküm, asen Naga nunger-a iba tsüngsü nungji British nunger yimsüsüba küpoki aitsüsa tensa mapangi bentsür aru.

Ano asen Naga nunger atema tia majung kaji British sorkar-i par yimsüsüba inyakyim sademtsü meji, asen Naga lima litsü agi asemsüpezüsü küma lemsar shilem kar Burma nung (Myanmar), kar Manipur nung, kar Arunachal nung aser kar Assam nung zükloktsü aser shilem tilaka "Naga Hills Tuensang Area" ta jar anünga toktsu, aser iba jagi tanü asen Nagaland ta jatet.

Aji oda, asen Naga nunger litsü British nungeri par ajung asa-a lemsa-a toktsübaji ka küma longjemtsü merangyongjia mekokteti tanü asen putu tashi timtema arudagi. Ajiser tanüngba asen Naga litsü telungzük nung alirtemji-a (Nagas of Nagaland) akhi mapang nungi kati ka den arishitepa tsükchitepa lia aruba kin asünung, tanü tashi ka küma longjemtsübaji o agibo bangpettsü amai jembir, saka mapa agibo meinyakteti lia arudagi.

Asenoki Indian History nungji züngdangra, India nunger British nunger nungi nüjiso meshiba mapa kodang tatempang telemtetba kati arutsüsa mapang tonga aru, idangji British nungeri India nunger nübur tsüngda nung telemsa adokdaktsütsü lenmang balala agi merangdang (Divide and Rule Policy) aser tia maka Hindu-Muslim tsüngda tebilemba meputepi balala küma-adok, aser linuk ana "India aser Pakistan" ta lemdanger-ang nüjiso angutsüsa atongtet. Yamaji parnok o parnok na tsüngda obang mapu kati ka den melongjemtetba ajanga British nunger nükjidong atalokdaktsü.

Aji oda, India sorkar-ia British nungeri par dang inyakba ama, asen Naga nunger tsüngda nung telemsa adokdaktsütsü atema sentong tapu balala atonger südi ta aiben shisadanger, aser asenok tsüngda telongjem makaba tia ya ngur, yakta telemtetba ka dangi arutsü amai süli, ano odang küm ishika süia yokli ta mesüshir südi ta aiben bilemer.

Anungji asenok kin o kin tsüngda telongjem makara, aser nüjiso bushirtema telongjem kati marutetra, ashiko asen Naga nunger-a lia lia India nunger tia jagi aitsü kecha meteta maka. Mezüng asen tsüraburtemi iba nüjiso bushiba mapa koda tenzüka aru, iba otsüji khen meyipa repringdangra, par mapang linük tenzükera telok ya meja meja ka dang liasü, aser linük tenzükertem o nübur na tsüngda longjema amalitepa kati ka akhümstsübutepa lia aru, aji oda, tanü-a iba libaliro tesendaktep tajungji mesamai wazüka ayutsüla.

Anungji kokrabangla linük tenzükertem telok paikati melemsai ka küma longjemtsü lenmang bushitsüla. Telok balala lemsar aliba longjemtsübaji kanga temelabo masü, kati ka nem tatok agütsütepba ajanga dang longjemtettsü, aser tesüiba mapang kati ka anema tashimait metokmeperi kar danga inyaka lira, item ajakji ama-adoktsüla. Aji oda, asenok kodang shisa obang ka ser longjemer nokdakdir, idangji-ang India nunger yagi asenok ola angashir tatempang telemtetba kati arutsü südi ta bilemer. Asenok tang amaisa melongjemi lira ashiko asen Naga nunger nüjiso angutsüba ya "Nokdensang-er ita" amaji talangi oa-adoktsu kecha meteta maka.

(Maneni taruba adok nung)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

KHRISTAN KIBONG

- T. Tsükjem Jamir, Senso Missionary, Longsa Baptist Arogo, Camp Dimapur

(Maneni taoba adok nungi...)

Khristian kibong karbo tia maka Tsüngrem nungi atsüngzüka oa pei sasa timtem jenti ajuruba tanü putu nung asenoki angur. Tejen putu nung Eli putir kibongji Tsüngremi Israel pur atema mezüja shimtet pai Israel nübur madak küm lir (40) Tsüngrem tenzüka aru. Saka tia maka pa tambur akümdang par chir ana Hofni aser Finehas nati tebei sayuba lenmang nungi pilaa temenen mapa inyak.

Anungji Tsüngrem taochi par kibong nungi pila. Iba mapang Israel nunger aser Filista nunger den raradang par chir anaprongla tsükchirtemi tepset aser ozüng süngden tsükchiri bener ao. Iba osang tamajung angashia Eli putir pei menden nungi tsüka asü.

Tanü putu nung chirnur majungba ajanga kibong dangi timtem balala aika asür. Ano yangi pei kibong tangi timtem ajuruba ka angur, mezüng Yirusalem arogo nunger lenir kibong Anania aser kinungtsü Safira kibongji Tsüngrem dang tenlaba nung ochi mashiba ajanga kinungbo aser kinungtsü naprongla taküm samaba angur. Aji oda tanü kibongtemi asen mapa tamajung agi asen dangi teraksaba marutsüsa kümdanga alitsüla.

America lima nung tatalokba otsü ka yamai lir, John F. Kennedy tebu tongtipang yi (wine) supplier liasü. Küm ishika tsüngda nung par kibong millionare aküm, Tsüngremi par kibong kanga moatsü, saka alizüng metongtet. Par chir John F. Kennedy America President aküm, saka mapang tatsüka tsüngda nung nisung tamajungeri kaset ano mapang tatsüka tsüngda nung pa tenu Robert Kennedy America Senator lia nisung tamajungeri kaset. Yamaji mapang tatsüka tsüngda nung election nung par rongsen ajak endok, aser par chir tajung ajak tsükchiri kaset. Yamaji par generation otsü tamajung nung atem.

Laishiba ashir, tsüraburi tasen achi nung pei chirnur tepoh (teeth) mejemer. Adianu tajungtem laishiba aser alima otsütem balala atalokba nungi asenoki lesson agia tarutsü anogotem nungi pei kibong tajungba yanglushia alitsü ayongzüker. Amen

ANO GO ABEN TSÜNGREM DEN

KATI KA DEN PUTE PANG

"Kü pelaba süngdaksütsü asoshi putepa liang... telongjem liang, aser kati ka den pute pang" - Filipi 2:2

Iba lai nung ya, Pauli asenok dang Khrista nung adianutem den temeim nung sentaktepa alitsü ajungshir. Pai longjemtsü aser putepa alitsü indang sayur. Asenok ajaki iba onok ya khen aroka bilemdangtsüla.

Yisui pa alima nung alidang kilir ama alitsü shimtet aser asenok Pa den pelatepa sentaktepa alitsü atema Pai asenok asoshi tematiba tenla agutsü. "Asenok temang tetenzük aser tabensadaktsüba Yisu, shibai pei jakdang, aliba tepela asoshi maksü arema kangki timtem aremzüka Tsüngrem chuba menden tajichilen amen" Ibr 12:2.

Puteptsüba tashiji asenoki Tsüngrem dang meshidi kechiaser Pai aji meimer aser asenok dang nungi iba tashi angabaji imlar, Yisu Khrista alima nung alidang ajak den kasa alitsü sayu. Yisui pa par nütüng ter ana tetsünga shitoktsü. Putepa tashi tulutiba kaji aseni ajemalutsüla aser Tsüngrem temeim ochi agi metettsüla. Joe Stowell yamai ashir, Meilongibo nai tangar den junga otetba jakla nü dak ngua na kanga süngmangtsü".

SARASADEM:

O Tsüngrem, külemi Nü dak pelaa alitsü, Nü temeim tashi agüjangma. Amen

Iraq nunger kati Muslim nunger dang Tsüngrem o sayur



Michigan, May 19 (Agencies): Baghdad yimtiba Iraq nung 1979 küm Al-Aethawi asoba sülen ita ishika lir, Saddam Hussein Tir aküm aser külen Ayatollah Khomeini-i Iran nung Islamic Revolution tenzüker aser ibaji ajanga linük ana tsüngda küm ti tashi rara.

Tang Al-Aethawi-i rara tiyong ka nung lir aser ibaji tamangba yimsü indang rara ta pai ashir.

US kübok Michigan nung alir Al-Aethawi-i June 3, 2017 nü pa indang taküm kuli aser pai inyakba otsü yimjak nung metetdaksütsü.

Selinsgrove nung aliba Susquehanna Valley Church of Christ nung sentong ka nung pai iba shilem agitsü.

Al-Aethawi arishi küm 16 asüandang Islam toktsü aser

Islam yimsü tongtiba sür aliba linük ka nung pai timtem aser tetsükdaksü aika ajuru aser talisa pa lanuwa asüandang timtem teimba ajurua liasü. Ajisüaka, pai pa taküm atema metsübu ta paisa shisem.

"Ozü kinunger ajak Muslim nunger dang lir aser parnoki tetenzük nungbo ni Khristan akümbaji magizük, saka tangbo ni parnok den tesentaktep tajung lir" ta Al-Aethawi-isa metetdaksü.

Iraq nung sepai aser engineer ama inyakba sülen 2011 nung pa arishi küm 32 asüandang, United States nung alitsü atema aru.

Pa Taylor, Michigan nung alir aser Dearborn yimti nung aliba Arab nunger den mission mapa inyaker.

Tesüiba küm asem tsüngda, pai US kübok state 25 den tema nung sentep 100 dak tali aser university ishika nung o jembio.

Al-Aethawi-i Arab Christian Ministry ka tenzüksü bilemer aser iba nung pai Muslim nunger dang Khrista indang temeim mezüng sayuba sülen Laishiba indang ochi sayunür.

"Ni Khristan ka akümba ajanga kü nem teimla, taküm tetuyuba aser temulungtetba ka agütsüogo. Khristan akümbaji khen atema nungi teti atema melenshiba lir" ta pai ashir.

Pa indang mission mapa nung shilem kaji "Muslim nunger dang Khrista osang sangdongba aser Khristantem dang Islam indang osang metetdaksüba lir" ta Al-Aethawi-isa metetdaksü.

Israel-i Donald Trump pelashishia agizüker



Jerusalem, May 21 (Agencies): May 22, 2017 nü US President Donald Trump-i Israel semdangtsü aser iba asoshi Jerusalem yimti nung pa pela agizükba billboards aser signs yuja lir.

Jerusalem yimdong nung "Trump ya Zion indang medemer" aser "Jerusalem-i Trump pelashishia agizüker" ta tezülubatem yua lir.

Iba maparen ya Dr. Michael Evans-i ketdangtsüa inyakba lir. Dr. Michael ya Friends of Zion Heritage Center Founder & Chair aser Founding Trump Faith Board nung züngsem ka lir.

"US Tir kati mapa inyak tenzüker, ita trok tsüngda Israel semdangtsüba aser tasü itta Western Wall semdangtsübaji shingai meimla aser meilemdangba mapa ka lir. Tesüiba mapang Tir shingai iba ya

meinyakdang" ta Dr. Michael Evans-i American President pelashishia agizükba osang metetdaksü.

"Evangelical voter temi pa nem vote agütsüba agi Donald Trump-i takok angu aser evangelical voter tem indang vote aika angubaji, America putiotsü nung tang mezüngbuba liasü. Maneni U.S. Embassy ji Jerusalem-i belentsü tamang lir" ta paisa shisem.

"Evangelicals-i onük atema atema akangakanga nokdaker aser iba anaji-Supreme Court aser Israel lir. President Trump-i Jerusalem agizüktsü aser US Embassy Jerusalem-i belentsü ta nangzükogo aser pa Tir inyakba mapang, ibaji tenangzükbaji mapa küma inyaktsü ta onoki temulung ajak agi amanger" ta paisa metetdaksü.

OLONG PAITEP # 4428

									1	
2		3			4					
5				6			7			8
9			10							
		11							12	
							13			
14	15				16					
			17							

TIPIEN

- 2. Tendangba - (8)
- 6. Shizük / Sayuba metet - (7)
- 9. Saklok / Asen - (4)
- 11. Acha-ayangertem - (7)
- 13. Arentak / Tama - (4)
- 14. Yimli sayutsü asüngdang- (7)
- 17. Mejanger anguba - (8)

LANGTSÜNGLEN

- 1. Shirangdang achiba - (4)
- 3. Ajang ajanger - (5)
- 4. Talangba aküm - (3)
- 5. Meta - (5)
- 7. Ajiser / Ibajiser - (4)
- 8. Komo tamaitsü - (5)
- 10. Mapang shia - (4)
- 12. Mebilemtet akümba - (5)
- 15. S_ _ _ _ ü - (4)
- 16. Senti oset - (3)

OLONG PAITEP # 4427 TELANGZÜBA

TIPIEN :

- 2. Atura, 4. Tenya, 7. Azü,
- 9. Anogo, 10. Ayong, 11. Jilia,
- 13. Akü, 14. Kimen, 15. Rajem.

LANGTSÜNGLEN :

- 1. Leper, 3. Tazüng, 5. Yongya,
- 6. Nüngjem, 8. Ayongnu, 9. Anüshi,
- 10. Ainkar, 12. Rosep

Noksa nung meputepi aliba tesem 10 bushiang



TANÜBO NAI LANGZÜANG

Q. India nunger shibai 2017 Intel International Science & Engineering Fair (ISEF) award (Environmental engineering category) angü?

- [A] Sairandi Sathyanarayanan [B] Pratik Naidu
- [C] Prashant Ranganathan [D] Sahithi Pingali

(Taruba adok nung onoki langzüsü)

YASHI ADOK TELANGZÜBA : Gandhinagar

Tanur asoba anogo nung salem osang den noksa angali adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAIA YA METETER MA

हरियाणा विद्यालय शिक्षा बोर्ड
Board of School Education Haryana

Established under Haryana Board of School Education Act, 1983



Tawa Haryana state sorkari school kaketshirtem atema e-textbook portal tenzükogo, kong kaketshirtemi Haryana School Education Board (HSEB) indang e-textbook portal nungi school kakettem melamela agizüktetsü. Iba portal nung tang tashi nung class 11 aser class 12 indang textbook 26 upload sütsüogo.

SUDOKU # 3540

4	9	7	8		5			1
		2				8		
8			6			7		
						9		
6	8		2	3	9		5	7
5						2	6	
					1		9	8
7	4	6	5				1	2
	1						7	

TELANGZÜBA # 3539

2	5	6	3	8	4	1	9	7
1	9	7	2	6	5	4	3	8
8	4	3	1	9	7	5	2	6
6	1	9	8	2	3	7	5	4
5	7	8	9	4	1	3	6	2
4	3	2	5	7	6	9	8	1
7	2	4	6	3	9	8	1	5
9	6	5	7	1	8	2	4	3
3	8	1	4	5	2	6	7	9

OJANG LUTEP # 4033

- IY : □□
- MEERJ : □□□□□
- KINGTEBOM : □□□□□□□□
- AERS : □□□□
- DCHIINGDYUIR : □□□□□□□□□□
- NGTEKBOMII : □□□□□□□□□□
- AARNGT : □□□□□□
- BOKING : □□□□□□
- ODGAANK : □□□□□□□
- PTMMENESÜE : □□□□□□□□□□

OJANG LUTEP TELANGZÜBA # 4032

AROGO NUNG TENZÜKBAJI TATEMTSÜ SÜDAKTSÜR PEI AJUNG INYAKBAPUR JENTI ADOKTSÜ

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):



Aries 21/3-19/4

Tanü nai ajem ajema melitetsü südi. Anungji nü mapa ajunga jungjunga shisadangang aser timtem majurutsüsa inyaktsü merangang.



Taurus 20/4-20/5

Nai akoktsüba aser nungdakba mapa dang inyaktsü merangang. Aser nü dak tasü tait molungjang lira nü mapa nung takok angutsü.



Gemini 21/5-20/6

Nü tasü tait molungsentsü tangar dang sayutsü nai maongka angutsü, saka iba sempet nai amshi shia amshitsüla. Mesüra nai lendong ajurutsü.



Cancer 21/6-22/7

Nür kibong asoshi nai teti bilemer. Saka khen-khenbo nai meinyakdangba mapa kar inyaktsü junger. Aser nü medemer ajakji kibong ka nungi amai bilemang.



Leo 23/7-22/8

Tanü nai jangraba mapa aika inyaktsü maongka arutsü aser na temolung olua bilemetsü. Saka nai mapa tali meinyaktsü merangang.



Virgo 23/8-22/9

Nai jangraba mesüra nü mapa nung masü saka lokti nung tasü ita nokdakang. Khen-khenbo nai mapa kar nungbo kanga tejangja nung meinyak tajungba asütsü.



Libra 23/9-22/10

Nü mapa nung tasü ita inyang saka tangar ajungshiba nung na temolung mulutsüla. Nü mapa nung dang temolung agütsü tajungba asütsü.



Scorpio 23/10-21/11

Nai jangraba mapa nung nai tasü ita inyaktsü anogo tajung asütsü. Saka menüngdakba nung nai amangba aser bilemba ajak ityaktetsü mebilemetsüla.



Sagittarius 22/11-21/12

Na tasü aittsü nungdaker, saka nü tashi dak alia iba sempet mamshitsüla. Tanü nai kilung nung masü saka saisapong amala kar nung nü mapang indokang.



Capricorn 22/12-19/1

Tasü itang saka nü sasa nü dak temolung tali malemetsüla. Inyaksangshi nung kümdangba ajanga lendong timtem aika nungi jenbuteter.



Aquarius 20/1-18/2


Nai bilemba aser amangba nung tasü ita nokdaktsü junger. Saka lendongi maitsü asoshi tangar taküm nung nai teka amoktsü memerangtsüla.



Pisces 19/2-20/3

Nü shisatsü aki tongtetba aser angatetba nung tasü ita menokdaktsüla. Medemer den shisa agiteba inyakba ajanga tanü nü maparen nung takok angutsü.

Thugs Of Hindostan film ya tanga film kari ajungmesoba ka masü: Aamir



Mumbai, May 21 (Agencies): Actor Aamir Khan-i Honibarnü pa indang taruba film 'Thugs Of Hindostan' ya Johnny Depp adokba Hollywood film 'Pirates of Caribbean'-i ajungmesoba film ka lir ta olulu adokbaji aitsüogo.

Dangal film nung shilem agirtem ajak den 'Dangal Dangal Baat Chali Hai' taser sensakemba sentong ka agiba sülen osangbenertem den jembidang Aamir-i ashiba agi, "Iba film ya tanga film kari ajungmesoba ka masü. Iba ya 'action adventure' film ka lir saka otsü ya balala. Action adventure film tem noklang

isheka lir, item rongnung Pirates of Caribbean, Indiana Jones nung amla lir. Anungji film yimyabo kasadang saka otsübo balala. Iba film nung kü shilema tangar dang nungi khenyongi balala lir."

'Thugs of Hindostan' film ya Vijay Krishna Acharya-i direct asü aser Aamir, Amitabh Bachchan, Katrina Kaif aser Fatima Sana Shaikh nungeri tongti shilem agir.

Fatima shiba Dangal film nung Aamir'er jala ama shilem agi, la maneni iba film nung shilem agitsü asoshi shimtetbaji telemtetba shidak liasü ta, Aamir-i bilmeba lemsatep.

"Onoki 'Thugs of Hindostan'

film June ita nungi tangok tenzüktsü. Fatima iba film nung heroin lir. La kanga dang artist tajung ka lir aser la iba shilem asoshi kanga tepet lir," ta Aamir-i ashi.

Dangal film ya China nung shishilembadak kanga takok ngua aodar aser iba dak sendakba nung actor-i ashiba agi, iba amala film ya oshi mesera sobaliba ajanga kecha mebendanger. "Nüburtemi iba film sapur ta ni bilemer. Iba amala film ya oshi aser sobaliba ajanga kecha mebendanger. Iba ya shidakba taküm otsü film ka lir aser iba ajanga tesem balala aser oshi kecha mebendangi ajak den sendaktepteter," ta paisa ashi.

China nungi pa sapurtemi nungi kecha osang agizüker magizüker ta asüngdang dang pai ashiba agi, "Ni China nungi osang aika agizükdar. Parnoki social media ajanga parnok tebilemba tem lemsatepba ajanga ni kanga pelar."

Osangbenertem den sensakemba mapang Aamir-i Dangal film nungi 'Dhakad Hai' ken tena tembang.

Russell Crowe-i Wolverine ama shilem magitsü

May 20, 2017 (Agencies): 'X-Men' film nung Wolverine indang shilem kodang jembitir nisung aikati temolung nung Hugh Jackman yakta bilemteter. '2000' küm superhero movie 'X-Men' nung Bryan Singer-i shilem agütsüba sülen tawa 'Logan' film tashi nung pa 'clawed mutant' ka ama küm 10 shi nüburtem jangratemdaktsüa shilem agia aruogo.

Aji saka mezüngbo Singer-i iba film nung 'Wolverine' shilem atema tangar ang ka bilemer liasü. Pai 'Gladiator' nung shilem agisang Russell Crowe nem iba shilem agidaktsütsü asoshi imlaa liasü.

"Iba mapang nung Bryan [Singer] kü medemer liasü aser pai iba shilem kü nem



kanga agidaktsünüa nungshi. Maximus cuirass teyong nung tsünü ka den külemi pa medemer ama shilem agitsüba tebilemdangbaji kanga mepeti iba mapang nung apitet anungji ni iba film nung shilem agitsü thitemtsü. Ni 'Mr. Wolf' ama 'wolfy' mesünü," ta Australian radio show 'Fitzy and Wippa' co-host asüba mapang Crowe-i rasaa

ashi. Ajisaka Jackman-i Wolverine ama shilem agiba nguogo aser iba ya 'Mr. Wolf' shilem den khenyongi balaka lir.

Jackman-i iba shilem agitsü asoshi shimtetba telemtetba asoshi nüburtemi pelaa bilemetsüla. Tangbo iba shilem tangar kari agira kanga balaka bilemetsü.



New Delhi nung aliba Air Force Auditorium Subroto Park nung 'Sachin a Billion Dreams' film sayaba sentong nung nisungtemi Group Captain (Hony) Sachin Tendulkar pela agizükba noksa nung angur.

TAN HOPTA ATEMA - KOMA SÜLA ?

Q Nagaland nung senzüba taxi aser auto rickshaw ajak ya Naga nungertemi dang anitsüla ta ozüng kuma latet nunga koma süla?

Olong 20 shi nung May 26, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.



Mumbai, May 20: Honibar aonung Mumbai nung Mrs India International indang Grand Final alidang akokertem, Mrs India International takoker, Mrs Neetu (abelen tanabuba) den first runners up, Joyti, second runners up, Khushboo Jani aser Radhika nungertem noksa nung angur.

Trump US tir akümba asoshi Twitter Co-founder-i tatok meshir

London, May 21 (Agencies): Taoba küm US tir shimsü asoshi agiba election nung Twitter ajanga teyari agüja Donald Trump adokdakja lira tatok agüjang, ta taoba mapang Twitter CEO aser co-founder, Evan Williams-i nüburttem dang ashi.

Election mapang Twitter ajanga shilem tajung agi, ta Trump-i March ita nung ashi. Iba osang indang Williams dang asüngdangdang, "Twitter-i US tir election nung shilem agiba ya kanga majung lir. Twitter mali

asübo pa tir makumi lila ta asünungbo onok tai lir, tatok agüjang," ta pai langzü.

Twitter nung Trump sülen anidaker nisung million 20 lir aser pa Republican telok nungi election nung tir asoshi tokteptsü tejangraba melemsatepdang nungi pa ya Twitter nung shilem kanga tajung agia liasü, ta osang ka ajanga ashi.

White House nungi Trump-i @POTUS (President of the United States) Twitter account amshiba sülen iba account sülen anidaker million 17 lir.

Iba sapang ya Trump busemertemi kanga amshia tir election agitsü mapang pa atema osang tajung aika prok aser Hillary Clinton anema osang balala prokshia liasü.

"Twitter ya mali asübo ni tang yangi melila, kechiyong ni osang tiazü dang angu aser ochimashi osang dang angashi. Saka iba nungji Fox bo mali. Fox bo küden junga liasü, saka nünoki CNN aser item amala network tem ji reprangdangang," ta Trump-i March ita nung Fox News dang shia liasü.

July 1 nungi tenzüka telecom service aser mobile phone tem nung sen atutsü

New Delhi, May 21 (Agencies): India nung Goods and Services Tax (GST) sendong ya July 1 nungi mapa küma aotsü aser iba ajanga telephone bill aser mobile handset nung sen jenjang atutsü.

Tang telecom operator dang tax shilem 15 agir aser GST Council ajanga renema aliba ajanga shilem 18 kümogo.

Iba ajanga sen 100 agi phone recharge asüba nung tax sen 3 akümer, saka GST kübok teyari anguba ya company temi süoki ia reprangdangra iba tetemlok ajanga costumer nem khuret tali magütsütsü, ta revenue secretary, Hasmukh Adhia-i ashi.

Tax ya ajaki angatetba ka lir aser iba inyakyim ya costumer tem dak tashi kongshir, aser taa meshiba ya ita shia bill nung sayutsü, ta company temi bo ashir.

Telecom nung tax tali tutsüba osang angashia mobile yangluba company temi tentetba, COAI nung Director General, Rajan S Mathews-i mepelaba osang ka sangdongogo.

"Telecom sector nung tang tax maparen tasen tenzüka ya sorkari khi reprangshitsüla aser tang jenjang 15 aliba nungi tali kümdaktsüra telecom service jenjang tasakba akümtsü," ta Rajan S Mathews-i ashi.

Sentemonoktsü agi sünger aliba telecom sector ya tang iba sen monoktsü asoshi sentong balala tenzüka inyakba mapang ka lir aser parnoki ashiba agi, telecom service jenjang tasakba akümtsü aser iba ajanga sorkar indang digital India aser digital ajanga senotsü tsütatepba amala maparen nung kongshitsü, ta shia lir.

Tang ya telecom amshirtem dang tax shilem 15 meshir.

"GST ajanga company tem aser costumer dak kongshiba ya bendangtetsüla. Costumer temi tax agütsü shia shilem 18 agütsütsü ya tasak lir," ta Mathews-isa ashi.

Linük nung jurisdiction 36 lir aser item rongnung state 29 aser union territory 7 lir. Item rongnungi territory 30 nung

mobile phone indang tax ya shilem 12 akümtsü aser iba ajanga jenjang tasakba akümtsü, ta Indian Cellular Association (ICA) ajanga ashir.

Linük nung mobile phone shishilembaba ya Gujarat, Maharashtra aser Madhya Pradesh ajanga shilem 25 ajunger aser item state nung tax ya shilem 12.5 nungi 16 tashi agir.

"Mobile phone nung tax shilem 12 agiba ajanga nüburttem kanga bo timtem magütsür, aser digital revolution tenzüksü asoshi iba tax ya shilem 5-i aludaktsü nungang linük nung nisung billion 1.2-i iba sentong takok ngua tenzüka amshitetsü," ta ICA, National President, Pankaj Mohindroo-i ashi.

Linük nung mobile handset ayokdak sen jenjang shilem 6 atuba ajanga shishilembaba nung shilem 66 nung kongshitsü.

Tanungba state aser Union Territory tem nung tax ya shilem 8 nungi 9 tashi agir aser item tesentem nunga jenjang timba akümtsü.

International Space Station-i June ita SpaceX Dragon yoktsü

May 20, 2017 (Agencies): SpaceX-i Dragon spacecraft I1 ben buba International Space Station (ISS)-i osettsüset balala bener NASA indang Kennedy Space Centre nungi June 1 nü yoktsü.

Dragon-i ISS nung alirtem atema supply balala, equipment aser scientific research tem bener tutsütsü, ta NASA-i Honibarnü metetdaksü.

Dragon spacecraft-i neutron stars, osteoporosis, solar panels

asere Earth-observation tools tem asoshi bushisüngdang balala aser facilities tem bener tutsütsü.

"Neutron star tem nung matter tem bushisüngdang den külemi technology demonstration; Station Explorer for X-ray Timing & Navigation Technology (SEXTANT) bener tutsütsü koba ajanga bushisüngdangertem nem pulsar-based, space navigation

system yangluba nung teyari agütsütsü," ta NASA-i metetdaksü.

Mananei NASA-i Roll-Out Solar Array (ROSA) solar panel tasen bener yoktsü koba tang aliba solar panel tem dang nungi tepongbaba aser iba ajanga tesem tilaba agir.

ROSA nung flexible blanket ka nung solar cells keta lir aser iba indang framework ya tape measure ama lir koba longzüka alur.

Bareilly Ki Barfi film tangokzükogo

Mumbai, May 21 (Agencies): Actor Rajkummar Rao-i Bareilly Ki Barfi film tangokba tembangogo aser pai ashiba agi, pa asoshi iba film nung shilem agibaji kanga dang jangratemtsüka liasü.

"Bareilly Ki Barfi' film tangokzükogo. Ni asoshi kanga dang jangratemtsü aser tangazükba tajung ka liasü. Film nung Pritam Vidroh-i shilem kanga jangratema agiogo," ta Rajkummar-i Deobarnü tweed asü.

Iba film nung shilem agitsü asoshi maongka agütsüba atema pai director Ashwiny

Iyer Tiwari dang pelaba metetdaksü. Iba film nung Ayushmann Khurrana aser Kriti Sanon nunger den shilem agir.

Iba hopta tetenzük nung Kriti-i film nung la shilem ken ka tangoka tembang.

Tang Rajkummar joko web-series "Bose" nung shilem agiba nung mazüngi inyaksü. Iba show nung pa actress Patralekhaa den külemi shilem agitsü. Maneni pa iba show nung Netaji Subhas Chandra Bose shilem agitsü aser iba show ya Hansal Mehta-i direct asütsü.

Dwayne Johnson 2020 tir menden asoshi tokteptsü akok



of the Furious' actor ya kanga aoksa liasü. "Ni kanga süngmanger. Ni bilemer iba ya nüburttemi tanü leneisüba tajungba ka aginüba ajanga asütsü südi," ta pai ashi.

Pai sa ashiba agi, "Kü taküm ya ajak den medemtangtetsüba taküm ka kümogo. Ni anepdang yakta saker mapai aoe aser toorps den mapang indoker. Ni ozü kibong anepalur aser nisungtem anepalutsü asoshi jangrar. Iba ajanga talisa tanü asüng nüburttem den ni sendakteptsü akoker ta bilemer."

May 21, 2017 (Agencies): Tawa Dwayne 'The Rock' Johnson-i pa 2020 nung tir menden atema tokteptsü bilemdar ta lemsatepba ajanga osang kaketterem aika nung kanga bulua adoka liasü.

Arishi küm 45 tain actor-i host Jimmy Fallon den jembidang ashiba agi, pa tir menden nung tokteptsü asoshi tebilemba lemsatepba sülen aikati iba dak sendakba nung kanga metetnüa temolung agütsür.

National poll nung tanü election agi nungbo pai President Donald Trump akoktsüba sayuba ajanga 'Fate

Ajisaka pa 2020 küm tir election nung tokteptsü asü metokteptsüar mejanga. "Küm asem ser tesadangji mapang talangka lir, anungji reprangdangti," ta paisa ashi.

Dwayne atema 2017 küm kanga junga tenzüko. 'Fate of the Furious' movie ajanga alima ajunga box office nung sen USD billion 1.197 dak tali aazükogo. Iba dak sendakba onük nung Dwayne Johnson-i Seth Gordon indang film 'Baywatch' nung Zac Efron aser Priyanka Chopra den shilem agiba angutsü. Iba movie US nung May 25 nü sayatsü asoshi renema lir.

Asaya live sayutsü asoshi e-sports den FB longjemogo

May 20, 2017 (Agencies): Asaya balala live sayutsüba dak sendakba nung Twitter aser Amazon meyong 'Twitch' den toktepa Facebook-i ghonda 5,550 tashi e-sports sayutsü atema events global e-sports company ESL den longjemogo.

Iba hopta Major League Baseball (MLB) den regular season asaya 20 social media nung live sayutsüba atema longjemba sülen iba osang Facebook-i metetdaksü.

"Iba sentong ajanga Facebook-i Amazon meyong Twitch aser Twitter nem tetoktepa agütsütsü. Iba app anaprongla ya asaya balala live sayutsü asoshi e-sports deal

yanglua lir," ta osang ka ajanga Honibarnü metetdaksü.

March ita Twitter-i ESL aser Dreamhack den asayamong balala aser tanga e-sports sentongtem live sayutsü asoshi longjema liasü. ESL One, Intel Extreme Masters (IEM) aser DreamHack circuits nung asaya sentong 15 dak nungi tali Twitter aser iba dak sendaka aliba device tem ajanga alima ajunga nung live sayutsü.

Intel Extreme Masters ajak aser ESL One tournament content den külemi ESL-i Twitter atema live original content ka agütsütsü koba nung 'highlight' aser 'behind-the-scene footage' tem hopta shia minute 30 show ka ajanga sayutsü.



May 21, 2017 nū New Delhi nung Tir, Pranab Mukherjee-i taoba mapang Ato kilonser, Rajiv Gandhi sūr kum 26 ajungba anogomung nung asūr nem akhūm agūtsūsū atema asūr memorial 'Vir Bhumi'-i aruba noksa nung angur. Kasa noksa nung taoba Ato kilonser, Manmohan Singh, Congress Tir, Sonia Gandhi aser lar jabaso, Rahul Gandhi nung-a angur.

Taruba NSG senden nunga India zūngsem mekūmtetsūa akok

New Delhi, May 21 (Agencies): Nuclear Suppliers Group (NSG) plenary senden taruba ita Swiss yimtiba, Bern nung amentsū, ajisūaka India-i iba telok nung zūngsem mekūmtetsūa akok, kechiyong tang tashi China linūki ibaji nokdang.

NSG-i nuclear osettem aser technology azioker, aser iba telok nung zūngsem akūmtsū atema yakūm May ita nung India-i benoka liasū.

Yakūm June ita South Korea yimtiba, Seoul nung NSG senden amendang India-a zūngsem linūki akūmtsū atema sūoka jembia liasū, ajisūaka China-i, India-i non-proliferation treaty (NPT) tezūngzūktep agia mali, ta shia nokdang.

NSG plenary senden amentsū mapang ana nung lia

ketdangsertem osang ka ajanga ashiba agi, India-i NSG nung zūngsem akūmtsū atema zūngsem linūki ajak den jembia arudar, saka tang tashi China-ibo nokdang.

India iba telok nung zūngsem akūmtsū atema US, UK, France aser Russia linūktēmibo nungita arudar.

Taruba ita Bern nung senden amendang India zūngsem akūmtsū atema benokba onūka jembitsūa akok, saka tang tashi tetsūkdangtsū lir, ta ketdangser kati ashi.

Ajisūaka taoba ita New Delhi nung China Ambassador, Luo Zhaohui-ibo, "NSG onūki nung onoki linūki kata menokdang," ta shia liasū.

Iba dak sendakba nung yakūm September 13 nū aser October 31 nū China nuclear

negotiator, Wang Qun aser India nung taoba disarmament secretary, Amandeep Singh Gill na tsūngda senden anaben mena liasū.

Yakūm Noember ita nung NSG consultative group senden nunga China-i maneni India zūngsem akūmtsū atema nokdanga liasū.

Yakūm June ita NSG senden nung China-i anir non NPT zūngsemtemi anema nokdakba ajanga India linūki NSG nung zūngsem akūmtsū atema benoka liaka iba asoshi telemtetba magi senden tembanga liasū.

China-i, India NSG nung zūngsem akūmtsū benokbaji magizūksūla, kechiyong parnoki NPT sign masū ta nokdakba nung tanga linūki 10-ia China pusema liasū.

Sonia-i tetsūr shilem 33 atema signature campaign tenzūkogo

New Delhi, May 21 (Agencies): Taoba Ato kilonser, Rajiv Gandhi asūba anogomung nung (May 21) asūr kinūngtsū aser Congress Party Tir, Sonia Gandhi-i Assembly elections aser Parliamentary election nung tetsūrtem nem menden shilem 33 shiteta yutsūsū atema signature campaign ka tenzūkogo.

Congress tatong Tir, Rahul Gandhi, Sonia Gandhi'er jala Priyanka Gandhi aser la kinūngbu Robert Vadra nungeria iba campaign nungita sign sūogo.

Iba dak sendakba nung, sorkar dang Parliament nung Women Reservation Bill benoka agizūksū takhangba agūja Mahila Congress-i linūki tesem ajaklen maparen tenzūkogo.

Osangbener den jembidang Mahila Congress Tir, Shobha Oza-i, "Taruba Parliament nung onoki Rajiv nūkjidong- tetsūr nem tashi agūtsūba atalokdaksūner. Onoki kibok shiai tua nūboyimtsū aser sign sūdaksūba sūlen August 20 nū India Tir nem temepishiba shidi ka agūtsūsū," ta metetdaksū.


Asūr Rajiv Gandhi nem

akhūm tetushi agūja Oza-i state ajaklen Mahila Congress-i azū tenlaba camps ayongzūkogo, aser iba nungji tetsūrtem aikati shilem agia azū tenladar, ta metetdaksū.

Iba campaign ya Rajiv Gandhi asoba anogomung, August 20 tashi akatsū.

Taoba Ato kilonser, Deve Gowda yimsūsūba mapang nung 1996 kum Women's Reservation Bill benoka liasū.

2010 kum iba bill ya Rajya Sabha nungbo agizūkogo, ajisūaka Lok Sabha nungbo tang tashi iba bill anendaka lir.



Srinagar, May 21, 2017: Srinagar yimti tesem aika nung ketdangsertemi curfew ozūng benokba sūlen security sepaitemi Mirwaiz Manzil tesem mita anūka noksa nung angur.

BJP-i ano Tir candidate meshim: Amit Shah

New Delhi, May 21 (Agencies): Taruba Tir election atema BJP-i ano candidate meshim, ta tanū BJP Tir, Amit Shah-i metetdaksū.

Shiv Sena-i India Tir candidate atema RSS tongti, Mohan Bhagwat shimtsū benoka liasū, ajisūaka BJP-i ibaji magizūk.

Takūm July ita nung agitsū aliba Tir election nung BJP-i aniba NDA candidate shiba asūtsū? ta TV channel kati asūngdangba langzūdang BJP Tir, Amit Shah-i, ano iba atema telemtetbaji magi, ta metetdaksū.

"Kū melungjang nung nisung nisung ka shimtsū bilema aliyonga, ibaji party den tama jembitsūla," ta pai ashi.

Kashmir tensa dak sendakba nung tasūngdangba ka langzūdang Shah-i, "Kashmir tensa indang bilemba aser atangji na tsūngda tepilaji tuluka

lir, aser timtem aliba tesemji district asem ser tesadang nung lir," ta ashi.

Congress Party aitsūba olen ka nung Shah-i, Congress-i sorkar aitsūbaji tim masū, kechiyong linūki nūjiso anguba sūlen par sorkar (Congress) mapatong balala ajanga Kashmir tebilemtsū ya adok, ta ashi.

Tamil Nadu nungi nūngtugu actor, Rajinikant-i BJP nung adentsū asū? ta asūngdangba langzūdang Shah-i, iba telemtetbaji pai dang agitsū akok, ta ashiba den kulemi party-i nisung tajungertembo ajak par party nung agizūker, ta shisem.

Narendra Modi'er sorkar kum asem abensatsū anogo ishika dang lia Shah-i, sorkari nūburtem tamang koktetogo aser sensakertemia sorkari parnok takūm jenjang ajungtsū atema inyaker ta amanger, ta ashi.



New Delhi, May 21, 2017: Saharanpur nung Dalit nung anema inyaba tali buluba anema Deobarnū New Delhi nung Dalit nung loki tentetemi mener longkak aitba noksa nung angur.

RSS-i British nung ang tenzūka aru: JD(U)

New Delhi/Patna, May 21 (Agencies): Uttar Pradesh Chief Minister, Yogi Adityanath-i, "Rashtriya Swayamsevak Sangh (RSS) melira Jammu & Kashmir, Punjab aser West Bengal state tem ya Pakistan shilem ka sūla," ta jembiba aija tanū Janata Dal-United (JD-U)-i, India linūki nūjiso bushiba mapang RSS-i shilem magi saka British nung ang tenzūka aru, ta aitsū.

Deobarnū Patna nung osangbener den jembidang JD (U) lenir, Neeraj Kumar-i, UP Chief Minister Yogi-i RSS indang putiotsū mejembitsūla, kechiyong parnok indang putiotsūji British nung yimsūsūrtem tenzūka otsū dang lir, ta ashi.

"Nisung ajaki RSS indang putiotsūji meteta lir. Parnoki British nung yimsūsūrtem atema dang inyaka aru, ibayongji linūki nūjiso bushidang RSS zūngsem ka danga tepoukdaki mai," ta paisa shisem.

Ano JD (U) lenir, Pavan

Verma-ia, "Adityanath-i tangtangbo Uttar Pradesh nung tensa azioktsū atema dang rangloker inyaksūla, kong pa yimsūsūba mapang nung tai maket nūburtem kangshidar. Anti-romeo squad aser Bajrang Dal telok mazūoktettsūsa kumdar. Pai RSS masū saka item onūki nung rangloker inyaksūla. RSS-i nūjiso bushidang shilem magi ta ajaki meteta lir," ta ashi.

Opposition party temi Chief Minister Yogi'er sorkari RSS tetuyuba kībok 'Nashi, Ganga aser Gau Raksha' nung dang rangloker inyaker ta aitsūba sūlen iba oji meyiotsūdang Yogi-i, "RSS aser Dr Syama Prasad Mookerjee na melira West Bengal, Punjab aser Kashmir state tem Pakistan kībok lila," ta jembia liasū.

Yogi-isa, alima nung sorkar dang nungi teyari magiba tentetji RSS kija lir, saka parnoki linūki aser sobaliba atema Swayamsewaks aser Pracharaks ajanga inyaker, ta jembia liasū.

Muslim linüktemi anir kiralongraba anema raratsüla: Donald Trump



Deobarnü Riyadh nung US Tir, Donald Trump-i Arab aser Muslim lennirtem den külemi agiba noksa ka angur.

Riyadh, May 21 (Agencies): Deobarnü US President Donald Trump-i Middle East nung lennirtem dang 'Islamic extremism' anema raratsü ayongzük aser pai ashiba agi, kiralongraba anema rara ya West aser Islam tsungda masü saka tajung aser tamajung tsungda rara ka lir ta metetdaksü.

Trump-i Tir akümba sülen tang mezüng atema bendanglima semdang aser Saudi Arabia nung anogon ananü amungdang, pai Deobarnü Muslim lennirtem den o jembibaji kanga tongtipang lir.

Iba sentong nung Arab aser Muslim lennir 50 dak tema aden aser Trump-i parnok dang Middle East nung America-i shilem tasen ka agitsü aser ibaji

kiralongraba tera nungi atsüteta endoktsü atema asungdang.

"Onok nenok dang sayutsüngitsü atema aruba masü, onoki nenok dang koma alitsü, kechi inyaksü mesüra koma külemtsü ta tuyutsü atema aruba masü. Onok nenok den külemi inyaksü asoshi tesentaktep yanglutsü atema aser külem tarutsü tajung ka yangertsü atema aruba lir" ta pai lennirtem dang ashi.

Trump-isa Middle East linüktem den külemi mapa inyaksü ta ashi saka pai iba tesem nung kiralongraba anema raratsü indang tongti süa jembibi.

"Nenok tekülemdak nungi parnok meindokang. Nenok lokti nungi parnok meindokang" ta pai Muslim lennirtem dang Islamic kiralongrartem atema

tayongzükba agütsü.

"Iba rara ya tamangba yimsü balala, telok balala mesüra nisung balala tsungda masü. Iba rara ya meimchir taküm samatsütsü meranger aser meimchir taküm kümzükba ayutsü meranger tsungda lir. Iba rara ya tajung aser tamajung tsungda lir" ta paisa shisem.

Trump-i anogo 9 nü atema bendang linüktem semdangba rongnung Saudi Arabia dak alia pai Israel, Vatican, Belgium aser Italy semdangtsü sentong lir.

Yashi King Salman bin Abdulaziz Al-Saud-i pa aser kinungtsü Melanie Trump na pela agizük aser pa pela agizükba sentong ka nung Saudi Arabia pa nem "Collar of Abdulaziz al Saud" sempet agütsü.

Duterte-i US dang kümdangtsü tuyur

Manila, May 21 (Agencies): United States-i par linük colony ka ama mezüngshidaksütsü ta Philippines Tir, Rodrigo Duterte-i metetdaksü.

"Parnoki yamaji züngshia arur. Nenoki ni yamaji amshitsü asü? Nibo magizüktsü. Nür colony nung governor ka ama ni meinyaksü. Onok ya linük balaka lir aser onoki litettsü" ta Duterte-i ashi.

"Onoki linük ama liyonga ottettsü aser onok yatzüra tia ajuruaka, onok akhümtsübua züngshiang" ta paisa shisem.

Philippines Tir-i US anema jembibaji tang mezüng masü saka pai aiben US anema jembio.

Yaküm October ita pai, "joko United States-i Philippine lushi nung mitkar teseptem



amenokba tatembang kati arur" ta ashi.

Yaküm November ita nunga Duterte-i, "Philippines-i US dang nungibo Russia aser China denang amaliteptsü bilemer" ta aser saka pai US Tir, Donald Trump den amalitep malitsü indangbo mejembi.



May 21, 2017 nü Iraq kübok Mosul nung Iraq sepaitem aser Islamic State kiralongrartem tsungda khatepdang yimdong nung garitem raksar aliba noksa nung angur. (Mosul, May 21)

Dalai Lama-i pa melenzüker shimtsü akok: Lobsang Sangay

Beijing, May 20 (Agencies): Dalai Lama-i yakta pa melenzüker ka shimtsü akok ta Tibetan government-in-exile Tir, Lobsang Sangay-i ashi.

Tang aliba Dalai Lama ya arishi küm 81 lir aser pa arishi küm nung tambur ka süaka kanga dang teyakyak lir aser pai pa melenzüker ka ano meshimi lir.

"Taruba Dalai Lama shimtsü atema maparen tenzükogo aser paji tanaben asoba, shimtetba mesüra tanela tashi ka ajanga shimtsü akok. Ajisüaka, iba asoshi ano

telemtetba magi lir" ta New Delhi nung South and East Asia Foundation-i ayongzükba 'Indo-Tibet Summit' nung Lobsang Sangay-i metetdaksü.

"Dalai Lama-i pa arishi küm 90 asüandang lemtettsü ta ashir saka yakta pa melenzüker shimtsü imlar" ta paisa shisem.

"China-i taruba Dalai Lama shimra ibaji ozüng alema inyakba ka asütsü. Communist party-i tamangba yimsüji mim ta ashir. Parnoki tamangba yimsü dak mamanger. Parnoki tekülem kitem raksatsür, monk aser nun tem tenüng agiener. Süra, parnoki kodaser taruba

Dalai Lama shimtsü?" ta Tibetan government-in-exile Tir-isa ashi.

China-i taruba Dalai Lama shimbaji communist lennir kati Shankaracharya shimba ama asütsü. Communist lennir kati shimba Shankaracharya ji tanidakertemi magizüktsü aser iba amaji Dalai Lama shimtsübaji shinga indang khuret masü saka Dalai Lama indang khuret lir, ta paisa metetdaksü.

Taoba ita tu China ketdangsertemi, Tibetan Buddhism nung tematiba monk ji China-i mulunga shim nisung ka asütsüla ta metetdakja lir.

Pakistan okatsürtemi PM Sharif nem anogo 5 züngzüktsür

Lahore, May 20 (Agencies): Honibarnü Pakistan nung okatsürtemi Prime Minister Nawaz Sharif nem anogo tenetnü tsungda pa menden toktsütsü mapang züngzüktsüogo.

Panama Papers onük atema pai Prime Minister menden toktsütsüla, aji mesüra parnoki linük ajungalen lungkak aitba sentong tenzüktsü, ta okatsürtemisa amokmerena metetdaksü.

Iba tetuyuba ya Supreme Court Bar Association (SCBA) aser Lahore High Court Bar Association (LHCBA) teloktemi agütsü.

"Panama Papers ken o atema Supreme Court-i oshidang agütsüba nung ajemdaker, Prime Minister Nawaz Sharif-i mapa meinyaksüla aser pai mapa nungi anentsüla" ta SCBA aser LHCBA nati ashi.

Panama ken o atema obendang agütsüba nung Sharif aser par tanurtemi senotsü tim mesü amshiba aser ochimeshii inyakba atema tai tongloksüogo, ta parnokisa metetdaksü.

"Iba ken o timi bushisüngdangtettsü atema Nawaz Sharif-i Prime Minister

menden toktsütsüla. Pai May 27 tashi nung menden metoktsüra, okatsürtemi Pakistan ajungalen pa anema lungkak aittsü" ta parnokisa shisem.

SCBA aser LHCBA külem senden mamendang, PML-N pusemba okatsürtemi Sharif anema mapa meinyaksütsü meranga, SCBA aser LHCBA ketdangpurtem den raratep.

PML-N okatsürtemi Lahore High Court indang library nung SCBA President Rasheed A Rizvi puoka ayu. Mapang tatsüka lir külen, SCBA züngsemtemi Rizvi anizük aser parnoki Mall Road nung lungkak aitba sentong ka agi.

Okatsürtemi Sharif anema nokdakba ajanga pai menden toktsütsüsa akümtsü ta Pakistan nung opposition-i ashir. Ajisüaka, National Assembly Speaker Ayaz Sadiq-i ashiba agi, "kechi ajurudir ajuruang, Sharif-i menden metoktsütsü aser May 31, 2018 tashi Prime Minister inyaksü."

Yaküm Panama Papers miim osang temai adokba nung Sharif'er tanurtemi British Virgin Islands nung aliba company tem den London nung kiojen aliba indang shia liasü aser iba sülen okadak Sharif anema ken o ya benok.



May 21, 2017 nü Ankara, Turkey nung AKP pur Extraordinary Congress nung Turkey President Tayyip Erdogan(tiyongtsü), den pa kinungtsü Emine Erdogan aser Prime Minister Binali Yildirim nungertemi party züngsemtem dak teka ayiploksüba noksa nung angur. Deobarnü President Erdogan-i linük nung yimjung aser tesünep tensa maru tashi emergency magientsü ta metetdaksü. Yaküm July 20 nü sorkar atsüngdoktsü merangba sülen Turkey nung emergency alitsü tetuyuba agütsü aser taküm April 18 nü parliament-i emergency ita asem tashi atsülangtsü telemtetba agi. (Ankara, May 21)



Dimapur, May 21, 2017: Deobarnü mopung tesashi aonba ajanga Kuda Village, Dimapur nung Greenwood school anasa süngdong tulu ka tera nungi atsüteta laodang Bengali Baptist Church, Dimapur Pastor, Rev. Kamal Dutta'er ki raksatsüba noksa nung angur. Iba lendong atalokdang kidangji nisung tenet liasü saka shinga meyrui ajak kümzük. Tang parnok ajak Tenla kidang jenoka lir.

Imphal nung Japan-i WWII...

(Tapak 1 nungi)

"Japan nungger sepaitem Biren Singh-i ashi. Japan nungger azüngtsü janngar Impthal aser Kohima nung Japanese ambassador India kaketshirtem atema arua rara aser parnok aika Hiramatsu-isa Impthal aser shisatokden ka alitsü aser kidangi meyipa moutet. Iba Nagaland nung Japan nungger Japan sorkari Manipur o dak sendakba nung sorkari sepaitem temang bushitetsü Nagaland nungi nisung Japan den takok lenmang atema nübortemi yaritepang ajak nung yariteptsü" ta ta mepishia metetdaksü. semdangtsü atema jaoker, ta Manipur Chief Minister N. Taküm November ita Hiramatsu-isa shisem.

RAINBOW COACHING CENTRE

MOTTO: "Learn to Lead" ★ ESTD. 2006. Dimapur Nagaland.

Admission Notice

Special Coaching Class For: Hostel for both Boys & Girls.

CL-10, CL-12 (Arts) & CL-12 (Science) ★ 24 hours running water ★ Hygienic food, Maintain strict attendance. Monthly test and performance exams. ★ Good study environment 98% passed result 2017. ★ Parental guidance

NB: Hostel seats available for Regular students. Walkable distance to many colleges. ★ Spiritual awakening programmes.

For details contact: 03862-248524 (0) 9856857778 / 9862700227

DIRECTORATE OF HIGHER EDUCATION

NAGALAND : KOHIMA.

NO.HED/SCHO-1/2016 Dated, Kohima the May 2017.

NOTIFICATION TO ALL THE FOLLOWING HEAD OF INSTITUTIONS

MOST IMMEDIATE

The undermentioned institutions are hereby informed to immediately contact the Department of Higher Education for finalization of duplicate Post Matric scholarship applications failing which all such cases shall be withheld as per the directive given by the Ministry of Tribal Affairs, GOI and the respective Institutions shall be held responsible for any lapses as initial verification of scholarship applications are done at the institution level.

The following Institutions are requested to contact the officials of the Directorate during the office hour on or before 10th June 2017 after which no calls shall be entertained. (Ph.No.9612948820, 9856713022 and 9612444549)

Colleges & University	Patkal Coll	Dimapur Mission HSS	Little Star Schl Dmpr
Alder Coll	People's Coll Mig	Don Bosco HSS Kma	Living Stone Schl Dmpr
Baiting Baptist Coll	Pranabananda women Coll	Don Bosco Wokha	Loyala Jakhama
Baptist Coll	Public Coll of Cam	DPS Dmpr	Mechur HSS
Bosco Coll of Teacher Edu	Sakra Coll	Fernandez Schl Kma	MGM Dmpr
C-Edge Coll	Salemian Coll	G. Rio	Misner's Hill HSS
Chartered Financial Analyst of India	Salt Christian Coll	GHS Thangjam Tag	Model HSS Kma
City Law Coll Dmpr	Salt Christian Coll of Teacher Edu	GHS Abol	Model HSS Mig
Dimapur Govt. Coll	Sai Ching Coll Tag	GHS Dmpr	Mount Mary HSS Dmpr
Don Bosco Coll	SAGR	GHS Jalukie	Mrs. Carmel Schl Kma
Eastern Christian Coll	Sakrie Coll	GHS Jomsoma	Mrs. Hannon Kma
Global Open Univ. Dmpr.	SD Jain Coll	GHS Kaphire	Mrs. Sinai HSS Kma
Health Sc. Research Dmpr	St. Joseph Coll	GHS Mayangnokcha	North Field
Immanuel Coll	Teacher's Edu Dmpr.	GHS Mon	Patkal Schl Dmpr
Japfu Coll	Tetsu Coll	GHS Mon Town D	Pranab Vidyaarthi HSS
JH Aier Coll	Tuli Coll	GHS Sankhasou	Ram Janak HSS
Kohima Coll	Unity Coll	GHS Tag	RGHSS Kma
Kohima Sc. Coll	Ura Coll of Teacher Edu	GHS Tuli	S. D. Jain HSS Dmpr
Model Christian Coll	Wanghae Coll	GHS Wokha	St. Mary Cathedral HSS Kma
Modern Coll	Yingli Coll	GHS Zobe	St. Mary's HSS Dmpr
Mt Tiyi Coll	Zunhefote Coll	Grace HSS Kma	St. Paul Sch. Dmpr
MLOlive Coll	Higher Secondary Schools	Great Comm. Kids Academy	St. Xavier HSS Peren
Mt View Christian Coll	Carmel HSS Dmpr	Greenwood Dmpr	St. John Schl Dmpr
Nagaland Rashtrabhasha Prachar Samiti	Chandmani HSS	JHV Dmpr	Stella HSS
NCTE, Kma	CHS Dmpr	John GHS Vivarana	T.M. GHS
NU Lumami	Corner Stone Foundation Schl Zobe	Konjong Schl Mon	Unity Christian HS Dmpr
NU Meriyema	Corner Stone HSS Dmpr.	Uma Aier Memorial	Vision Home HSS
Oriental Coll	Quincy Buds Schl	URR Flower HSS	Woodland schl Zobe

DIRECTOR
HIGHER EDUCATION
NAGALAND - KOHIMA

Issued by : DIPR

Kohima nung AHOds... (Tapak 2 nungi...)

DC-isa, department balala (products) osang agütsü. ket nung ali aser kiojen indang Item units nungi adokdaksba osang alitsüla aser maneni item osettemji tangalen nungi bener osangji repringshitsüla, iba den aruba den tamajungba masü külemi department temi aser jenjanga dalang, ta shia T. kümshia ali aser kiojen osang Longri Ao-i, sorkar department renemtsüla aser arrtsü yanglua balalai sorkar indang projects atsüa atsütsüla, ta ashi. mesüra kiojen balala yangludang

NSMDC Managing item units nungi adokdaksüba Director, T. Longri Ao-ia osettem amshitsü ajungshitsüla, Nagaland State Mineral ta ashi.

Development Corporation Ltd.- Senden tenzüka Anti-i parnok indang industrial unit Terrorism Day tenangzükba asem- Decorative & agia liasü. Iba anogomung ya Dimensional Stone Plant agia liasü. Iba anogomung ya (DDSP) Chümukedima, DDSP May 21 nü amunger, ajisiuka iba anogo ya Deobar anogo aser Wazeho aser Mineral Industry state sorkar office sodi anogo Growth Centre (MIGC), ka asübayong May 20 nü Kiruphema nungi adokdaksüba mungogo.

OFFICE OF THE

LANUTSÜLAK SEMCHIR TELONGJEM LAKHUNI

B.P.O Alongtaki P.O Mangkolemba

TENÜNGSANG AGÜTSÜR

Wb. Lanupokym aser Wt. Merenkala na jabaso Wb. ARENLONG LANGUR-i BSNL nung Junior Engineer mapa inyaksü jenjang anguba atema Lanutsülak Semchir Telongjem Lakhuni-i tenüngsang agütsür.

Nai iba mapa anguba ajanga LSTL nem tenüng tajung bener arutsügo aser lanurtemi tarutsü nung jenjang temaba atongtsü atema teimla, tejangraba aser len sayur. Tsüngremi iba wadang tasen nung na len aniang ta LSTL-i sarasademtsür.

Sd/-

TINU LANGUR,

President, LSTL

Sd/-

TEMJENSOBA)

Secretary, LSTL

Office of the A Khel

Mangmetong Jamitsür Telongjem

Tenüngsang Agutsür

MISS MERENLEMLA JAMITSÜR, Mr & Mrs. S. Lanu Jamir aser Mrs. Alila Longkümtsür na jala, Post of Assistant Professors Class-I Gazetted under Higher Education Department NPSC Exam nung No. 1 asüba takok tulu kintsür aser alima nem konang nüngsang bener arutsüba asoshi la nem Jamitsür Telongjem Mangmetong-i kanga dang pelar aser tetushi tulu agütsür. La wadang ano maneni Tsüngremi moajang ta onok sarasadem lir.

Ano kaketshir kwikati HSLC, HSSLC nung takok tulu gutetogo, ajak dang kanga dang pelaba metetdaksür.

Sd/-

Samayngla Jamitsür

President

Sd/-

Talikala Jamitsür

Secretary

Office of the

Moupungchuket Ait Laishir Telongjem (MALT)

P.O. Impur - 798615

Moupungchuket : Nagaland

Tenüngsang Agutsür

Moupungchuket Ait Laishir Telongjem (MALT) ajanga item züngsem nem tenüngsang agütsür :

- Kr. Katirenlia**, Wb. Bendangkokba, IAS-er jala PGT (Pol.Sc) Government of Nagaland nung jenjang tajung ngutetba atema tenüngsang agütsür.
- Sp. Nektichung B Ozukum**, Wb. Bendangwabang Ozüküm'er jabaso HSSLC Exam nung Top 10 (Science) jenjang tajung ngutetba atema tetushi agütsür.

Maneni Yajen Aier Government High School Moupungchuket HSLC mezüngbuba tatidang agütsüba nung 91% jenjang ngutetba asoshi MALT ajanga tesayur aser kaketshir ajak nem tenüngsang tulu agütsür. Ibe den külemi MALT sanger kwi naka HSLC aser HSSLC tatidangtem nung takok nguogo, nenok ajak nem MALT ajanga khonang tetushi agütsür. Tsüngremi nenok taküm aser wadang maneni moajangma.

Sd/-

Akumyanger

Tir, MALT

Sd/-

Rongsentsula

Tongti Zülur, MALT

METONGSHITSÜR

ABAM Youth Ministry ajanga Mulungnen koba Tir Yimyim May 18, 2017 adok, tapak 5 nung lir idaki temelenshika yamaya agütsür. Arogo, kija aser lokti palala shirnoki iba Clean election campaign- Bullet And Bikers Rally, nung yaritepogo item tenüng agütsüba nung serial no. 9. Nung - Tuli Town Baptist Church, Tuli College, ta alibaji Tuli Lenden Baptist Arogo aser Tuli college ta Metongshitsür. Aibelen asoshi sasa bilemer. Amanger, ajaki tangatetba tajung agi metongshiba agizüksü.

Kibubar wadang nung,

Sd/-

Toshi Sanglir

ABAM Youth Secretary

Mumbai-i Pune run 1 agi kokogo

May, 21 2017 (Agencies): Johnson (3/26)-i Run arishiba nung Rising Rajiv Gandhi International tatemangbuba over kanga Cricket Stadium, Hyderabad jung ona Steve Smith out nung IPL 2017 final asaya nung sutsüba den külem asaya Mumbai Indians (MI)-i run 1 akok. MI nungi asayar Krunal Pandya-i 47 yanglua par telok agi Rising Pune Supergiant (RPS) kokogo. Iba takok nungi pai run timteba ajanga parnok IPI asembe buba akoker. Over 20 nung wicket 8 out ser parnok run Asaya nung Mitchell 129 yaglutet.

Pune Supergiant (RPS) pur asoshi over 20 nung run 130 nungdaka liasü saka parnok over 20 nung wicket 6 out ser run 128 dang yanglutet. Parnok rongnungi Steve Smith-i ball 50 nung run 51 yanglua parnok rongnungi pai run timteba yanglutet.

Elina aser Zverev-i Italian Open nung takok angu



Rome, May 21 (Agencies): Ukraine tsür Elina Svitolina-i maneni iba season nung kanga junga asayaa Honibarnü Italian Open final asaya nung 4-6, 7-5, 6-1 agi yirur alila Simona Halep madak takok nguogo.

Semi-final asaya nung French Open champion Spain tsür Garbine Muguruza yiruba ajanga Svitolina Honibarnü Italian Open final nung mezüngbuba final asayatsü asoshi maongka angu. Iba asaya lai 4-1 agi kokya liasü.

Aji saka Svitolina shibai tanabuba jenjang nung alila Czech tsür Karolina Pliskova

quarter-finals nung akok lai la final nung asyatsü asoshi temsüa lir ta la asaya ajanga sayu. Lai asaya mezüngbuba set makok saka tanabuba set kanga meranga asayar 7-5 agi lai akok aser iba sülen set tasembuba 6-1 agi ayong ayonga akok.

Halep shibai taoba hopta Madrid Open koka liasü, la second set asayaba mapang techichi tetsüng tatentep iruba ajanga anepalutsü nungdaka aküm.

Asaya nung decider asayaba mapang Halep yirur masayatetba kanga janga

ajiteta liasü aser iba ajanga Svitolina-i iba asaya ayonga ayonga akok. Svitolina asoshi iba season nung Taipei, Dubai aser Istanbul open akokba sülen iba ya la asoshi 4buba takok asütsü.

Svitolina-i iba season nung asaya 31 koka Pliskova ajatetogo, aser final nung Simona Halep akokba ajanga la No. 1 kümogo.

Maneni Deobarnü tebur final asaya nung Alexander Zverev-i 6-4, 6-3 agi Novak Djokovic koka Italian Open benogo.

Arishi küm 20 tain Zverev ya Djokovic-i Miami open küm 10 tejakdang küm 19 asüdang akokba sülen Masters 1000 event akoker rongnung tanobusang lir.

Zverev-i asaya mezüng game nung Djokovic service break asü aser iba sülen pai asaya ayong ayonga akok.

Iba takok ajanga Zverev teburtem ranking nung jenjang 10 buba tongtetogo aser pa French Open abentsü asoshi imlar rongnung züngsemogo. Iba küm asoshi tanabuba Grand Slam taruba Honibarnü nungi tenzüksü.

ANTAM-i 44 AR inyakyim...

ANTAM-i nübor tenzüksü asoshi bendang agüja mapa inyaka arur aser tanga teloktem aser shishilembaba teloktem ama, Naga Yimten Teloktemi onok danga mapang shia sen meshiba shiditem yoker. Iba sen meshiba shiditemji mendenpurtemi ketdangsüa repranger. Anungji, ANTAM tir tenüng zülur yokba shidi ka atema pa apubaji tim masü aser ozüng alema inyakba ka lir.

Ibala inyakyim ajanga Mokokchung nungdang masü saka Nagaland ajungalen onoki inyakba mapa nung tetsükdaktsü ajurutsü. Anungji, nüji shisatsü aliba nisungtemi ajaki iba inyakyim kukua aitsütsü ayongzüker, ta ANTAM mendenpurtemisa ashi.

Iba tatalokba osang angashiba sülen ANTAM züngsemtemi tetenzük nungi tatem tashi

(Tapak 1 nungi)

yaritepba aser ano Mokokchung District Trucks' Association o Mokokchung District Pick-Up Union temi onok pusema nungitba atema kanga pelar. Maneni, ANTAM legal advisor Advocate Mangko aser lawyer Takum Jamir nati iba tatalokba nung yaritepba atema tena dang kanga pelaba shisemer, ta Tatong Tir aser Tongti Tezülur natisa metetdaksüogo.

1 buba Quasar Cycling

Dimapur, May 21 (TYO): ayongtsü. Iba sentong indang 2017 World Environment Day, June 5 nung Quasar Club Kohima ajanga 1buba Quasar Cycling Competition ayongzüksü. Iba sentong ya "Cycle Towards a Green Future" omen nung ajemdaker Jotsoma yim nung agütsü. Iba sentong ya Forest Department Kohima aser XTB Cycling Club den külemi Krank Hub ajanga

ayongtsü. Iba sentong indang noksa ya Richa Production ajanga agütsü.

Iba tetoktepeba nung shilem aginürtemi Krank Hub, Raj Bhavan Kohima nungi form agizüktsü. Iba sentong asoshi tali jangjanürtemi mobile No. 9612341682 aser 8575217667 ajanga tongteprateptsü asoshi ketdangser sangdong ka ajanga metetdaksü.

N'Golo Kante nem Premier League

Player of the Year nungja agütsüogo

May 21, 2017 (Agencies): Chelsea midfielder N'Golo Kante Premier League Player of the Year ta nungja Deobarnü agütsüogo. Iba takok ya pa asoshi iba season nung tasembuba asütsü, koba nung Premier League title küm nabuba atonga akokba densema lir.

Arishi küm 26 tain France nung asayar ya taküm Premier League champion Leicester City nungi July ita Chelsea den aden. Pa nem Football Writers Association aser the Professional Footballers Association ajanga Player of the Year nungja agüjadoker liasü.

Kante den iba award asoshi tetokteper rongnung par telok nung Eden Hazard aser Cesar Azpilicueta, Tottenham Hotspur nungi Harry Kane, Dele Alli aser Jan Vertonghen, Everton nungi Romelu Lukaku aser Arsenal nungi Alexis Sanchez ta liasü.

"Player of the year nungja kü nem agütsüba ya kü asoshi

tetushi olura aser kü asoshi vote asürtem ajak dang kanga pelar," ta Kante league website nung zülutsü.

Kante-i iba season peyong nung Manchester United den asayadang goal ka agütsü aser assist-a ka dang asü saka pai asayartem parnok asaya raksatsüba, Chelsea defence ajangshidsaktsüba aser tejaklen attack asüba nung shilem tajung agi, koba par team asoshi tongtibangtiba liasü.

"Ni training mapang kanga meranga inyak; ni akokba tajungtiba agütsütsü asoshi merang aser ni asayar tajung aika den asayaba ajanga onoki league akok," ta paisa ashi.

"Onoki asaya tajung aika asayaa aruogo saka Everton den 5-0 agi akokba asaya kanga tajung liasü aser ano Manchester United den asayadang ni goal ka agütsüba kanga tajung liasü. Iba asaya ana ya kanga temolung süa bilemer," ta pai maneni shisem.

Juventus-i otsü yanglua

Serie A takok trokben aben

Turin, May 21 (Agencies): Deobarnü Mezüng asaya nung Mario Mandzukic aser Paulo Dybala nati goal ka-ka aser asaya tatemtsü anasa Alex Sandro-i goal ka agütsüba agi Juventus teloki Crotona madak 3-0 agi takok ngua Serie A takok marok trokben atonga benogo. Massimiliano Allegri teloki Roma madak takok anguba ajanga point ka agi par telok timba aküm aser asaya ka akokba ajanga parnok Serie A marok abentsü liasü.

Juventus telok ya taruba hopta nung Bologna den final asayatsü lir, saka par telok ya parnok den tatong alir dang pointsü pezü agi timba lir.

Croatia nung arishi küm 31 tain, Mandzukic-i asaya tenzüker minute 12buba nung mezüng goal agütsü.

Maneni mezüng asaya

tembangtsü minute 6 lia Dybala-i free kick metsüba nung goal ka agütsütet.

Taoba hopta Stadio Olimpico nung Roma-i goal asem agütsü saka Allegri teloki goal ka dang agütsütetba ajanga par telok-i takok marok anguba atema pelatsü aliba anendakja liasü.

Saka anogo asem lir Juventus-i Lazio den asayaba mapang goal ana agütsütetba ajanga par telok tanaben iba takok marok agizüktsü asoshi anasa-i ao.

Asaya tembangtsü minute 7 lia Sandro-i metsüba ball Cordaz-i tekolak agi tongloksü aser 'goal-line technology' ajanga iba ball line alema iogo, ta sayu.

Juventus teloki June 3, Cardiff nung 11ben takok ngua alir Real Madrid den Champions League final asayatsü.

BILEMDANGANG

"Shibai na ain adokdaksür, pai na akoker."